

PAGSAGOP ²

 Ako...medyo naulahi lang ko. Aduna man gu'y usa ka tawo nga bayolente, bayolente kaayo, ug mogikan na man unta ako niadtong orasa, tungod kay grabe gyud, kaayo sila. Ug mibiyahé ako gikan pa sa Michigan, nagtawag na man og sheriff, ug uban pa, tungod nga grabe, grabe na gyud kaayo. Pero, karon okey na man; ang tanan—ang tanan kontrolado na, mao nga maayo na gayud. Pag nagaabot man gud ang Ginoo, ang tanan kontrolado na dayon, dili ba? Oh, Siya—Siya'y maayo kaayo; ang hunahunaon gayud ang Iyang pagkamaayo ug ang Iyang kalooy, kung unsa Siya kamahinungdanon kanato, ug kung unsa ka bililhon ang mga pagdayeg Kaniya.

Bueno, gipaningkamotan natong magsugod, ingon nga nasulti na man nga atong pagahisgotan ang unang tulo ka kapitulo sa Basahon sa Mga Taga-Efeso. Ug sa hunahuna ko ang unang tulo ka mga pulong pa lang gani ang atong nahisgotan, o ang unang tulo ka *butang* dinha. Wala pa gyud kita ingon nga nakahisgot og ayo, pero karong gabhiona tingali'g makahisgot na kita og dugang pa. Karon, buut kong isulti nga dili baya ko usa ka magtutuo sa Biblia, halayo ra gyud, ug halayo ra sàb kaayo sa usa ka teologo, apan ako—gihigugma ko ang Ginoo, ug gusto ko gayud Siyang alagaran...[Usa ka igsoong lalaki ang nagapakig-istorya kang Igsoong Branham—Ed.]

Adunay, miingon, nga may usa kono ka panghitabo nga kinahanglan maiampo dayon, sa dili pa kita magpadayon karon, usa ka batang babaye kono ang atua sa ospital sa Louisville, ug misurender na kono ang tanang pinakamaayo nga mga espesyalista kaniya, naghimalatyon na siya karon, ug mao nga may naghangyo og mga pag-ampo alang niining maong bata. Ingon nga mga Cristohanon, katungdanan nato nga iduko ang atong mga ulo, karon, para sa pag-ampo.

Among maloloy-ong Ginoo, dili lang namo katungdanan kini, kondili pribilihiyo gyud usab namo, ug mao nga among—among ginatinguha karong gabhiona nga iduko namo ang among mga ulo ingon nga usa ka iglesia, ingon nga usa ka pundok nga mga tinawag-pagawas, nga mga tawong nagatoo nga ania karong gabhiona, aron itudlo ang Imong Pulong, nga ginapuwesto kami ngadto sa Lawas, nga diin kami nahisakop, ug kon diin kaming tanan tukma nga makapamuhat ingon nga mga bahin sa Lawas ni Cristo.

² Ug karon gihangyo kami nga moduol sa gilayon ngadto sa Dios. Ug matag usa kanamo nga mga amahan nagahunahuna nga, unsa kaha kung ang amo kadtong anak nga babaye, daw sa unsa nga magdilaab ug masakitan gayud ang among mga

kasingkasing sa kinasuloran namo, ug nga manawagan gyud kami sa mga kaiglesiahan nga mag-ampo sa gilayon. Ug ingon nga dunay usa ka amahan nga nagadilaab, og nasakitan ang kasingkasing. Ginoo, hinaut nga moabot karon mismo ang mahimayaong Persona sa Espiritu Santo ngadto sa kasingkasing nianang amahan. Kuhaa ang tanang pagduhaduha, ug ang tanang kasakit, ug ipahibalo kaniya nga Ikaw mao ang Dios ug wala gayu'y balatian nga makapabilin diha sa Imong Presensiya pag ang Imong Balaanong sugo nabuhat na sa Imong iglesia ug sa Imong katawohan.

³ Ug sa tibuok semana, nagaampo kami, sukad pa niadtong miaging Domingo akong napamalandongan ang mahitungod niini nga mga pamaagi o kini nga mga pamaagi sa pag-ampo. Wala kami'y dakung hinagiban maingon sa tan-aw sa kalibutan, apan kining gamay'ng lamboyog makamatay gayud pag magunitan na kini sa mga tudlo sa pagtoo. Oh Ginoo, hinaut nga mapuntirya sa among mga pag-ampo, kanang kamatayon nga nagapaibabaw sa maong bata, ug hinaut nga mawagtang gayud; ang kangitngit, og mga kaguol, palayo sa kiliran sa higdaanan sa maong masuso, sa maong bata o anak, nga batang babaye. Ug hinaut nga mosidlak diha kaniya ang dakung Kahayag sa Presensiya sa Dios. Hinaut nga mogawas siya sa maong ospital, nga himsog na nga bata.

⁴ Dios, nasayod kami nga sa tabok lamang sa suba nagahulat ang among mga minahal sa kinabuhi, ug mahimayaon gayud kana. Apan gihigugma man usab namo ang among mga anak. Ug ginaampo namo, Ginoo, alang sa Imong kahimayaan, nga lugwayan Mo pa ang kinabuhi sa maong bata. Kami, ingon nga Imong iglesia, ginahinginlan namo kana nga kamatayon, ug nagaingon, "Humunong ka dinha. Dili mo mahimong kuhaon kana nga bata, tungod kay ginaangkon namo ang kinabuhi niana alang sa Gingharian sa Dios." Itugot kining mga butanga, Ginoo, nga diretsong moigo sa among ginapuntirya, sa Ngalan ni Jesus Cristo, nga among Manluluwas. Amen.

⁵ Nagatoo ba kita? Wala ako mahibalo kon unsay akong buhaton kung dili pa ako usa ka Cristohanon. Dili ko na gyud tinguhaon pa nga magpabilin og dugay. Tungod wala na ma'y bisan unsang hinungdan para mabuhi, gawas lamang sa pagdala sa ubang mga tawo paingon sa kaluwasan, mao lang kana ang pinakamaayo nga nahibaloan ko.

⁶ Bueno, karong gabhiona buut natong sugdan ùna ang diyutay'ng basihanang sa atong nahaunang leksyon. Ug paningkamotan kong basahon, siguro, ang tibuok kapitulo, kung mahimo ko karong gabhiona. Ug sa Domingo sa buntag siguro kinahanglan nakong magpahigayon og duha ka panagtigum sa Domingo sa buntag ug sa gabii usab, kung okey lang kana, aron nga mahisgotan kining posisyon nga ginatinguha kong makita sa iglesia. Oh, mahimayaon gayud kon masayran mo

ang imong posisyon! Ug walay si kinsa man ang makabuhay og bisan unsa gawas kon bug-os gayud ka nga nahibalo sa imong ginabuhay.

⁷ Unsa kaha kung magkaaduna ka . . . og operasyon, ug dunay usa ka batan-on pa nga doktor nga bag-ohay pa lang nga migraduwar sa tulonghaan nga iyang . . . nga wala pa sukad-sukad nakahimo og pag-opera. Pero bisan pa niana, siya'y batan-on pa ug guwapo, ug pinahapay pa gyud ang pagkasudlay sa iyang buhok, ug maanindot kaayo ang iyang bisti, ambongan gayud, ug tanan na. Ug moingon siya, "Ako nang gipahait ang mga himan nga igihiwa, ug ako nang gihinloan aron mawala ang mga kagaw sa tanang mga gamit ug mga ingon-anang butang." Apan magkaaduna gyud ka og medyo makapatahap nga pagbati bahin niana. Mao nga mas gustohon ko pa gihapon ang usa ka tigulang nga doktor nga nakahimo na og ingon niana nga pag-opera sa makadaghan nang higayon, sa dili pa ako maoperahan. Ako—gusto ko ùnang ilhon ang usa ka tawo nga dili bag-ohay pa lang nga migraduwar, gusto ko og usa ka tawo nga aduna gyu'y kasinatian.

⁸ Ug ang Usa nga dunay pinakamaayong kasinatian nga akong nasayran, nga pagatawgon karong gabhiona, mao ang Balaang Espiritu. Siya mao ang gamhanang Mananambal sa Dios ug gamhanang Magtutudlo usab.

⁹ Ug sa paghatag og basihan sa akong Mensahe karong gabhiona, nga mao gihapon sa kadtong wali niadtong Domingo, nga kaniadto, gisalikway nila si Samuel nga adunay Pulong sa Ginoo, ug gidawat si Saul, nga anak ni Kish, ug gisalikway si Samuel, nga nagrepresentar sa Balaang Espiritu, tungod kay nagasulti lang man siya sa diha nga pangunahan na siya sa Espiritu para manulti. Ug sa dihang gitawag niya ang ilang pagtagad kaniadto, ingon siya, "Hinumdumi n'yo, wala gyud ko nagsulti kaninyo sukad og bisan unsang butang diha sa Ngalan sa Ginoo kondili kung unsa lang ang ginapahitabo sa Ginoo. Wala usab ako nagkinabuhi nga may gibuhay nga di-maayo sa inyong atubangan. Ug walay si kinsa man ang makapasangil nga ako nakasala."

Sama sa gisulti ni Jesus, "Kinsa ba ang makahukom Kanako og silot tungod sa sala?" Kita n'yo?

¹⁰ Ug miingon usab siya, nga, "Wala ako miduol kaninyo para manglimos kaninyo og salapi ug uban pa. Wala pud ako'y gikuha gikan kaninyo. Kondili ang tanan nga gikasulti ko para gayud sa inyong kaayohan, nga akong gipahayag kaninyo gikan sa baba sa Ginoo."

¹¹ Ug tuod man nagpamatuod ang tanang mga tawo, "Tinuod bitaw. Tinuod kanang tanan, apan bisan pa man gusto gihapon namo nga magkaaduna og usa ka hari. Gusto namo nga mamahimong sama sa tanang uban pa sa kalibutan."

¹² Karon, niining gabhiona, ang atong Kasulatan mao ang pagbahin-bahin...ang Basahon sa Mga Taga-Efeso, mao ang Basahon ni Josue diha sa Bag-ong Tugon. Kini mao ang pagbahin-bahin ug ang pagpahimutang sa “mga mananaug.” Karon, maghatag lang ko og paghulagway sa makadiyut, aron hisgotan una ang usa ka bahin sa dili pa kita mosugod og basa, nga magsugod sa ika-3 nga bersekulo. Bueno, atong nahibaloan niadtong miaging Domingo nga ang...ang Dios sa Daang Tugon nagsaad sa Israel og usa ka yuta nga kapahulayan, tungod kay nahimo man sila nga mga magpapanaw ug mga latagaw kaniadto. Ug atua sila sa yuta nga dili ilaha, ug mao nga nagsaad ang Dios kang Abraham nga mamahimo siyang dumuloong... ang iyang kaliwatan mamahimong dumuloong sulod sa upat ka gatus ka tuig taliwala sa dili kaila nila nga mga tawo, ug pagadaug-daugon, apan pinaagi sa usa ka kusgan nga kamot Iyang ipahigawas sila ngadto sa usa ka maayong yuta nga nagapaagay og gatas ug dugos.

¹³ Ug, bueno, kaniadtong haduol na ang panahon sa maong saad, nagpatungha ang Dios og usa ka tawo nga magadala kanila ngadto sa maong yuta. Pila ba dinhi sa kongregasyon karong gabhiona ang nakahibalo kung kinsa kadtong...kung si kinsa kadto? Si Moises. Matikdi n’yo, usa gayud siya ka, hingpit nga tipo sa Usa nga gikahatag kanato nga mao’y magadala usab kanato ngadto sa Yutang saad, si Cristo. Bueno aduna man pu’y saad kanato, tungod kay ang saad kanato mao man ang espirituhanong Kapahulayan, apan, ang sa ilaha mao’y pisikal nga kapahulayan. Ug busa nagpaingon sila kaniadto sa usa ka yuta nga masulti nilang, “Mao na kini ang among yuta, dili na kami magalatagaw pa, nakapahiluna na kami, mao kini ang among yuta, ug dinhi aduna kami’y kapahulayan. Magatanum kami og among mais, og among mga kaparrasan, ug magakaon kami gikan sa among kaparrasan. Ug dayon pag motaliwan na kami, amo kining ibilin sa among mga anak.”

¹⁴ Oh, pagkanindot gayud nga atong mahisgotan ang mahitungod nianang yutaa, ang mga balaod mahitungod sa pagpanunod, sama niadtong kang Noemi ug ni Ruth, og ni Boaz, og balikan ang tanan niana, kon daw sa unsa nga ang usa ka igsoong lalaki sa Israel, gikinahanglan niyang... ang unsa mang butang nga iyang nawala kinahanglan nga tuboson sa usa ka kabanay. Oh, pagkamaanindot gayud! Ngani magkinahanglan gyud og daghang mga semana, sa paghisgot mahitungod niini, pero dili gyud gihapon tà makabiya niini nga kapitulo. Mahitakdo man gud nato ang tibuok Biblia dinhi mismo, niining usa ka kapitulo.

¹⁵ Ug, oh, ganahan gyud ko nga magtuon Niini. Gitun-an na nato Kini kaniadto, ug gitun-an Kini sulod sa usa ka tuig ug tunga, ug wala na gani tà nakabiya sa maong Basahon. Nagpabilin na lang gyud dinhi Niini.

¹⁶ Karon, apan, usa gayud ka halangdong butang ang maong panulondon, tungod nga ang makapanunod sa yuta walay si bisan kinsa pa ang makatubos niana nga panulondon kondili ang usa ka duol nga kabanay lamang. Bueno, lakbitan ko lang ang bahin sa usa ka gamay'ng timaan nga akong nahisgotan niadtong miaging gabii, para kaninyo nga mga inahan. Pila ba ang ania dinhi nga nagaampo para sa inyong mga minahal sa kinabuhi, nga nahisalaag? Okey. Ingon niana usab, kita n'yo, "Ang inyong panulondon." Kita n'yo?

¹⁷ Giingnan ni Pablo ang maong Taga-Roma, miingon, "Tumoo ka kang Ginoong Jesus Cristo, ug ikaw ug ang imong panimalay maluwat." Kung aduna ka'y igong pagtoo para sa kaugalingon mo mismo nga mamaluwas, nan magmaaduna ka usab og igong pagtoo, bisan unsa pa ka nahisalaag kanang batang lalaki, o kanang batang babaye, mamaluwas gayud sila bisan pa man. Tungod ang Dios, aduna gyu'y paagi! Kung kinahanglan man Niya silang pahigdaon, nga magbuy-od dinha sa usa ka ospital, og himalatyon na, mamaluwas gyud sila. Gisaad na kana sa Dios. Ang panulondon! Oh! "Ug mamaatua sila didto," ang ingon ni Isaías, "ug ang tanan nilang mga kaliwatan magauban kanila. Sila dili modaut ni molaglag sa bisan kinsa diha sa tibuok nakong bukid nga balaan, nagaingon ang Ginoo."

¹⁸ Oh, aduna diay ko'y gamay'ng bahin nga akong ginalauman nga mahisgotan karong gabhiona, para kaninyo. Nga nagadilaab gayud sa akong kasingkasing, mahitungod niana nga sigeng gabalik-balik.

¹⁹ Apan karon, padayon tà. Bueno inyo bang namatikdan si Moises, kadtong tigpamuhat og dagkung milagro nga mao'y nagpahigawas sa Israel didto sa maong nasud, ug gidala sila paingon sa yutang saad, apan wala gibahin-bahin ngadto kanila ang ilang panulondon? Wala man niya nahatag kanila ang ilang panulondon; gipangunahan niya sila paingon ngadto sa yuta, apan si Josue ang nagbahin-bahin niadtong yutaa para sa mga tawo. Husto ba? Ug si Cristo man sàb ang nagdala sa Iglesia paingon sa dapit kon diin gipresentar kanila ang ilang panag-iya, og gihatag kanila, og pagalatason na lang ang Jordan, apan ang Balaang Espiritu Mao gayud Ang nagahan-ay sa Iglesia. Ang Josue sa karong panahon ang nagahan-ay sa Iglesia, nagahatag ngadto sa matag usa, og mga gasa, mga puwesto, og katungdanan. Ug Siya mao ang Tingog sa Dios nga nagapakigsulti sa tawong anaa sa sulod nga giluwat na ni Cristo, ang Balaang Espiritu. Karon inyo bang nasabtan og ayo ang mahitungod niini? Karon moadto na kita sa Basahon sa Mga Taga-Efeso. Bueno, sa mao gihapon nga paagi, Iyang ginapuwesto ang Iglesia sa kon asa sila nahiangay. Kaniadto, gipahimutang sila ni Josue sa natural nga kayutaan. Sa karon ginapahimutang usab sa Balaang Espiritu ang Iglesia, sumala sa pagkapuwesto, diha sa kayutaan, nga ilang, diha sa puwesto

kon diin sila nahiangay, sa ilang panulondon.

²⁰ Karon, ang unang butang nga iyang gisugdan dinhi, ginapahinungod niya ang iyang sulat ingon nga, “si Pablo, . . .” Nga, atong mahibaloan pagkataudtaud nga kining tanang tinago gikapadayag kaniya, dili pinaagi sa usa ka seminaryo, dili pinaagi ni kinsa man nga teologo, kondili usa kini ka Balaanong kapadayagan sa Espiritu Santo nga gihatag sa Dios kang Pablo. Ingon nga hingsayran niya nga ang tinago sa Dios, ingon siya, nga dugay nang gililong sukad pa sa pagkatukod sa kalibutan, gikapadayag kaniya sa Balaang Espiritu. Ug ang Balaang Espiritu nga anaa sa taliwala sa mga tawo ginahan-ay ang matag usa, og ginapuwesto ang Iglesia.

²¹ Bueno, ang unang butang nga gisugdan ni Pablo dinhi nga isulti ngadto sa mga tawo, mao ang awhagon ang tanang. . . Hinumdumi n’yo, para kini sa Iglesia, dili para sa mga tagagawas. Para kaniya usa man gud kini ka misteryo nga mga talinghaga, nga dili gayud arang masabtan, molabay ra ibabaw sa iyang ulo, og wala gyud siya’y hibangkaagan mahitungod niini. Apan, para sa Iglesia, dugos kini nga anaa sa bato, kalipay kini nga dili-maasoy, kini mao ang mapanalanginong kasiguradohan, kini mao ang angkla sa kalag, kini mao ang atong paglaum ug sandiganan, kini mao ang Bato sa mga Kapanahonan, oh, kini mao ang tanan-tanan nga maayo. Kay ang mga langit ug yuta mangahanaw man, apan ang Pulong sa Dios dili gayud mahanaw.

²² Apan ang tawo nga anaa gawas sa Canaan wala gyu’y hibangkaagan mahitungod niini, siya’y nagalatagaw sa gihapon. Pero wala ko nagaingon nga dili siya maayo nga tawo, wala ko nagaingon niana. Wala usab ko nagaingon nga ang tawo sa Egipto dili maayo nga tawo, apan siya. . . gawas kon makadangat siya sa niini nga panag-iya.

²³ Ug ang panag-iya, nga, saad nga gikahatag para sa Iglesia dili usa ka natural nga yuta, kondili usa ka espirituwal nga yuta, tungod kay usa man kita ka harianong pagkasacerdote, usa ka balaang nasud. Ug sa niining harianong pagka-sacerdote, balaang nasud, talagsaon nga katawohan, mga tinawag pagawas, gipili, mga pinili, og gipahilain, kung ingon niana patay na ang tibuok kalibutan sa gawas. Ug ginapangunahan kita sa Espiritu. Ang mga anak nga lalaki ug mga anak nga babaye sa Dios ginapangunahan sa Espiritu sa Dios; dili sa tawo, kondili sa Espiritu.

²⁴ Ang tanan, ang tibuok butang karon nabugkos na sa gugma. Ngani gipaningkamotan gyud kining itudlo sa makadaghan nang higayon, ug walay pagduhaduha nga mas naipasabot kini og ayo sa bantugang mga teologo kaysa mahimo ko. Apan ang butang gayud nga buut kong maipasabot kaninyo mao kini: nga ang usa ka tawo nga anaa kang Cristo, og

adunay Espiritu Santo, makalahutay gayud sa usa ka tawo kon sayup man kini; mapuanguron, maaghop, o mapailubon; siya'y malolot, mapainubsanon, maunongon, puno sa Espiritu; dili gayud negatibo; kondili kanunay gyud nga positibo; og lahi siya nga klase sa tawo.

²⁵ Dili lang basta usa ka tawo nga, “Naangkon na namo kini kaniadto. Tungod nga kung nakasinggit kami, naangkon namo kini, kami nga mga Methodist. Oh, kung nakasinggit kami, anaa na gyud kami sa Yuta.” Maayo man kana, okey pud kana, nagatoo man usab ko niana.

²⁶ Dayon miabot ang mga Pentecostal nga may pagsulti og laing mga pinulongan, ila sab konong, “Naangkon kini; kay ang tanan nga nakasulti og laing mga pinulongan nakaangkon na niini.” Nagatoo ko niana, usab. Apan atong nahibaloan nga daghan sa gihapon ang wala pa nakadawat Niini, nakita n'yo. Kita n'yo? Karon sila'y . . .

²⁷ Moadto na kita karon sa niining dakung gililong nga tinago nga dugay nang gililong sukad pa sa pagkatukod sa kalibutan ug gikapadayag na karon sa kaulahiang mga adlaw ngadto sa mga anak sa Dios. Nagatoo ba kamo nga tinuod kini, nga ang mga anak sa Dios, gipadayag na? Sa dili pa kita moadto sa kon asa man, moabli una kita sa makadiyut sa Mga Taga-Roma sa ika-8 nga kapitulo, og tugoti kong basahon kaninyo ang usa ka butang. Tan-awa n'yo kung takdo ba kini sa akong ginasulti dinhi. Karon ablihan nato ang Mga Taga-Roma 8, sa ika-19 nga bersekulo sa—sa ika-8 nga kapitulo sa Mga Taga-Roma:

Kay sa mainiton nga pagpaabot . . . ang kabuhatan nagahulat sa mga pagkapinadayag sa mga anak sa Dios.

²⁸ Ingon nga may mainiton nga mga pagpaabot, ang tibuok kabuhatan nagahulat na sa pagpahayag. Kita n'yo, pagpahayag! Unsa man ang pagpahayag? Mao ang pagpadayag!

²⁹ Ang tibuok kalibutan. Ang mga Mohammedan didto, nagapangita sila niini. Sa tanang dapit, kon asa man, nagapangita gyud sila niini. “Hain na man kini nga mga tawo?” Ngani nagkaaduna na kita og . . . Nakasinati na kita og nagahaguros nga makusog nga hangin, nakasinati na kita og mga dalugdog ug kilat, nagkaaduna na kita og lana ug dugo, nagkaaduna na kita og tanan nang matang sa mga butang, apan napakyas kita nga madungog kanang malumong gamay nga Tingog nga nagdani niadtong propeta nga nagputos og kupo ug miadto didto, nga nag-ingon, “Ania ako, Ginoo.” Kita n'yo?

³⁰ Karon ang tibuok kabuhatan nagaagulo gayud ug nagahulat na sa pagkapinadayag sa mga anak sa Dios. Bueno, ipahimutang una ni Pablo ang Iglesia eksakto sa kon diin Kini nahiangay. Karon aron nga makuha gyud nato ang basihanang, atong basahon pag-usab:

Si Pablo, nga apostol ni Jesus Cristo pinaagi sa kabubut-on sa Dios, alang sa mga balaan (mao kana ang “maong mga balaan”) nga anaa sa Efeso, ug . . . sa mga kasaligan diha kang Cristo Jesus:

³¹ Karon, aron nga dili kini mahikalimtan sa mga mananambong, kung unsaon man nato pagpakasulod diha kang Cristo? Nagapamiyembro ba kita sa iglesia aron makasulod kang Cristo? Nagahimo ba kita og mga pagpahayag aron makasulod kang Cristo? Kinahanglan ba natong maituslob sa tubig aron makasulod kang Cristo? Unsaon ba nato pagpakasulod diha kang Cristo? Unang Mga Taga-Corinto, sa ika-12 nga kapitulo, “Kay pinaagi sa usa ka Espiritu,” usa ka, dakung E-s-p-i-r-i-t-u, nga mao ang Balaang Espiritu, “kitang tanan gibautismohan pasulod ngadto sa Yutang saad.”

³² Sa niini nga Yutang saad, panag-iya nato ang tanang butang, pag anaa na sa Yutang saad. Nakita mo ba kini, Igsoong Collins? Kita n’yo, ang tanang butang anaa na sa Yutang saad! Pero kaniadtong mitabok ang Israel sa Jordan, paingon sa yutang saad, bug-os gayud sila nga nagpakig-away!

³³ Bueno hinumdumi n’yo, nga sa niining Yutang saad, wala nagapasabot nga dili na kamo matakbuyan og sakit, wala pud nagapasabot nga dili na kamo magkaproblema. Apan ingon niini ang ginasulti niini (Oh! Motuhop gyud unta kini nga halawom.), ang ginasulti niini, nga inyoha na kini! Basta mobarug lang ug angkonon kini! Kita n’yo? Sa dihang . . .

³⁴ Ug, hinumdumi, nga ang bugtong hinungdan nga namatyan ang Israel og usa ka tawo kaniadto, mao’y sa diha nga nakasulod sa kampo ang sala. Mao sàb kana ang bugtong hinungdan nga mawad-an kita og—og kadaugan, pag makasulod na sa kampo ang sala, aduna na gayu’y sayup sa kon asa man. Ngani sa dihang gikawat ni Achan kadtong sisip ug kadtong kupo nga ginama sa Babilonia, nakasulod na ang sala sa kampo kaniadto, ug mao nga napukan sila sa pakiggubat.

³⁵ Itugyan n’yo kanako karong gabhiona kining—kinig iglesia, kini nga pundok sa mga tawo, nga bug-os, bug-os gayud nga anaa sa saad sa Dios, nga adunay Espiritu Santo, og nagakinabuhi diha sa Espiritu, ginahagit ko ang unsa man nga balatian o unsa man nga pag-antus, o unsa pa man, bisan pa ang tanang Joe Lewis sa nasud, uban sa tanan niyang pagkawalay-pagtoo, ug ang tanang mga dili-magtotoo, nga dalhon dinhi ang mga may balatian o mga nagaantus pasulod niini nga pultahan, ug manggawas gyud sila dinhi nga bug-os gayud nga naayo na. Oo, sir. Gihatag na man sa Dios ang maong saad, pero ang sala na lang sa dili-pagtoo ang nagababag niini. Bueno hisgotan ra nato kung unsa kining gamay nga sala, pagkataudtaud. Karon:

. . . nga anaa kang Cristo Jesus:

Ang grasya maanaa unta nganha kaninyo, ug ang pakigdait, nga gikan sa Dios nga atong Amahan, ug . . . sa Ginoong Jesus Cristo.

Delaygon ang Dios ug Amahan sa atong Ginoong Jesus Cristo, nga nagpanalangin kanato sa tanang panalangin nga espirituhanon diha sa mga langitnong dapit nga diha kang Cristo, diha—diha kang Cristo:

³⁶ Pag anaa kita diha kang Cristo, aduna gyud kita'y espirituhanong panalangin. Pero pag anaa gawas kang Cristo, nan mga sensasyon lang ang anaa kanato. Diha kang Cristo aduna gyud kita'y tinuod nga panalangin. Dili nga mga too-too lamang, dili mga pagpakaaron-arong lang, dili pud mga hinipokrito lang. Pero kung hangtud lang kamo sa pagsulti nga anaa na kamo sa Yutang saad, pero wala pa diay, nan masakpan gyud kamo sa inyong mga sala. Ug, mahibaloan n'yo na lang, mapalغان n'yo ang inyong kaugalingon nga mini diay ug—ug tanan na, sama sa tawag nato niini sa kalibutan, nadikitan og hugaw. Mahibaloan n'yo nga wala pa gyud diay kaninyo kung unsay inyong ginapamahayag. Apan pag anaa ka na kang Cristo Jesus, nan gisaad na Niya kanimo ang Langitnong pakigdait, ang Langitnong mga panalangin, ang Langitnong Espiritu, og ang tanan-tanan imoha na. Anaa na man ka sa Yutang saad ug bug-os gayud nga panag-iya na ang tanang butang. Amen. Pagkaanindot gayud! Oh, magtuon na ta:

Ingon nga siya nagpili kanato . . .

³⁷ Bueno, dinhi gyud nagakapangdol og ayo ang iglesia.

Ingon nga siya nagpili kanato diha kaniya . . . (Kang Kinsa man?) kang Cristo.

³⁸ Hingsayran nato karon, nga dinha mismo sa—sa Genesis ug diha sa Pinadayag, Pinadayag 17:8, nga gipili na Niya kita diha kang Cristo sa wala pa ang pagkatukod sa kalibutan. Karon, ang pulong . . . Basahon ko ang sunod:

. . . pagtukod sa kalibutan, aron kita mahimong balaan ug walay ikasaway sa iyang atubangan . . .

Kita iyang gipili-nang-daan . . .

³⁹ Karon gusto kong mohunong una diha nianang pulong nga “gipili-nang-daan.” Bueno, ang *gipili-nang-daan* dili ingon nga, “Pilion ko si Igsoong Neville, ug ako—ako—ako—ako—dili ko pilion si Igsoong Beeler.” Dili ingon niana. Kondili tungod kini sa pagkahibalo-nang-daan sa Dios nga hingsayran na Niya kung kinsa ang matarung ug kung kinsa ang dili matarung. Busa, pinaagi sa pagkahibalo-nang-daan, hingsayran na gyud sa Dios kung unsay Iyang pagabuhaton, mao nga Siya nagpili-nang-daan pinaagi sa Iyang pagkahibalo-nang-daan aron himoon ang tanang mga butang nga masigtabang alang sa ikaayo niadtong mga nahigugma sa Dios, aron Iyang pagatawgon, sa

kapanahonan nga umalabot, ang tanang mga butang diha sa Usa na lang, nga mao si Cristo Jesus.

⁴⁰ I-drawing ko ùsa para kaninyo ang usa ka diyutay'ng paghulagway dinhi. Maayo man gud kini. Mao nga balikan sa nato, nagtoo ko nga nahisgotan ko na og diyutay ang mahitungod niini niadtong miaging gabii, o nalakbitan ra kini, diha sa Genesis, sa ika-1 nga kapitulo, 1:26, sa dihang gitawag sa Dios ang Iyang Ngalan nga, “Ginoong Dios,” pulong kini nga El, Elah, Elohim, nga ang buut ipasabot “ang Maong nagalungtad-sa-kinaugalingon.” Wala na’y uban pa nga nabuhi kaniadto gawas Kaniya. Wala pa’y hangin, wala pa’y kahayag, wala pa’y mga bitoon, wala pa’y kalibutan, wala gayu’y bisan unsa pa man. Kondili ang Dios, ug ang Dios lang gayud, El, Elah, Elohim. Pero, Siya mismo ang naghimo sa mga niini.

⁴¹ Sa sulod niini dunay mga kinaiyahan nga ang buut ipasabot Siya’y usa ka . . . Sa sulod niining gamhanang El, Elah, Elohim dunay usa ka kinaiyahan o usa ka . . . Kabalo na man mo kung unsa ang *kinaiyahan*, o isulti ko na lang kini nga ingon niini, usa ka “kaugalingong-kinaiya.” Aron nga masabtan kini sa gamay'ng bata, ug usa man ako sa gagmay'ng mga bata nga kinahanglang makasabot niini sa ingon-ana nga paagi. Sa sulod Niya dunay kaugalingong-kinaiya nga mamahimong usa ka Amahan, pero Siya kaniadto nagalungtad-nga-nag-inusara, tungod wala pa ma’y bisan unsa kaniadto para mahimo Siyang usa ka Amahan. Ug, bueno, sa sulod niini dunay usa pa ka butang, nga Siya’y Dios; ug ang dios usa man ka butang nga silimbahon; pero sa gihapon Siya nagalungtad-nga-nag-inusara, El, Elah, Elah, Elohim, tungod wala pa ma’y bisan unsa kaniadto nga mosimba Kaniya. Pero sa sulod niana, Siya’y usa ka Manluluwas, pero wala pa ma’y bisan unsa nga nahisalaag kaniadto aron pagaluwason. Kita n’yo? Sa sulod niana, Siya’y usa pud ka Mananambal, kita n’yo, pero wala ma’y bisan unsa kaniadto aron pagaayohon, wala gayu’y bisan unsa pa kaniadto nga magmasakiton. Karon nahulagway na ba ninyo? Busa nagmugna ang Iyang mga kinaiyahan, ang Iyang kaugalingong-kinaiya og kung unsa man nga aduna sa karon.

⁴² Moingon ang ubang mga tawo, “Bueno, nganong wala na lang kana giundang sa Dios sa sugod pa lang kaniadto?” “Usa man Siya ka walay kalooy,” ang ingon ni Joe Lewis, kadtong nagkondena kang Joe, o kang Jack Coe diay, kita n’yo. Ingon pa, “Usa gayud Siya ka walay kalooy. Mao nga wala gyu’y ingon nianang butang sama sa Dios. Kung aduna ma’y ingon niana, nan Siya’y mamahimong usa ka . . .” Oh, ako . . . gibansagan gyud Siya og tanan nang matang sa mga ngalan, kita n’yo. Apan tungod man gud kana nga ang maong tawo aduna na’y daghang kahibalo *dinhi*, pero wala gyud siya’y bisan unsa man lang *dinhi*.

⁴³ Karon, kana, ingon-ana kana dinha. Kita n’yo? Pero kining Pulong ang nagasulti niini dinhi, ug gililong Niya kini. Ug dugay

nang gililong kini nga mga tinago, hinumdumi, nga ang Biblia miingon, “Sukad pa sa pagkatukod sa kalibutan, nagahulat na sa pagkapinadayag sa mga anak sa Dios,” nga maipasundayag sila ngadto sa iglesia. Oh, my! Nasabtan n’yo ba kini?

⁴⁴ Karon mohunong ùsa ko bahin sa akong ginahulagway sa makadiyut lang, o akong ipahayag... moadto ùsa ko sa akong sunod nga panghunahuna aron maipasabot kini. Karon hinumdumi, nga sa tibuok kapanahonan ni Moises, sukad pa sa mga kapanahonan sa mga propeta, sukad pa sa tanang mga kapanahonan, nanaghulat sila hangtud niining kaulahiang mga adlaw nga maipasundayag kining mga butanga, sumala sa Kasulatan. Husto kana, aron mahipadayag kini ngadto sa mga anak sa Dios. Ngano man? Gikan sa nangawala... hangtud sa susama sa piramide, sa ako nang gikaingon, nga gitukod nga nagakaduol, nagakaduol, og nagakaduol pa.

⁴⁵ Sama sa kanunay ko nang ginapahayag, ug ginaingon, nga naghimo ang Dios og tulo ka Biblia. Ang una, gipahimutang Niya Kini diha sa kawanangan, nga mao ang zodiac. Nakita na ba ninyo ang zodiac? Unsa man ang unang hulagway sa zodiac? Ang birhen. Unsa man pud ang kaulahiang hulagway sa zodiac? Ang Leo nga leon. Mianhi Siya kaniadto sa unang higayon sa birhen, moanhi pud Siya sa ikaduhang higayon ingon nga mao ang Leon sa banay ni Juda. Kita n’yo?

⁴⁶ Gihimo Niya ang sunod diha sa piramide, sa kaniadtong mga adlaw ni Enoch, sa dihang gihimo nila ang piramide. Ug gisukod nila kadto. Ngani dili ko masabtan kana. Apan para sa mga gubat, kon diin sila manghupo ug mokamang sa ingon ka taas, ug masukod sàb ang gidugayon tali sa mga gubat. Kabalo ba mo kung hangtud asa na kutob ang sukod niadto sa karon? Hangtud mismo ngadto sa lawak sa hari. Ug sa nagakataas ang maong piramide... Dili gani kita makatukod og ingon-ana, bisan pa sa tanang butang nga aduna kita sa karon. Dili gyud kita makatukod og ingon-ana.

⁴⁷ Gitukod kadto nga sama *niini*, hangtud ra sa usa ka punto. Ug ang bato sa ibabaw... Wala gayu’y makita nga batong-pangtaklub. Wala gyud sila nagbutang og taklub ibabaw sa piramide. Wala ko kabalo kon nasayod ba mo niini o wala, nga ang dakung piramide sa Egipto, wala pa sukad-sukad nagkaaduna og bato diha sa ibabaw niini. Ngano man? Tungod gisalikway man ang batong-pangtaklub, si Cristo, ang Pangulong-bato, kita n’yo, gisalikway man.

⁴⁸ Apan ingon nga nagapataas og nagapataas kita gikan sa kapanahonang Lutheran, kapanahonan sa Baptist, kapanahonan sa Methodist, og kapanahonan sa Pentecostal, karon ania na kita karon sa pagtaklub na sa maong Bato, kita n’yo, nga nagahulat ug nagapangandoy nga mapahimutang na ang Batong pangtaklub, og para matapos na ang maong

building. Wala ba ninyo nabasa sa Kasulatan nga, “Ang maong bato gisalikway”? Siyempre, nasayod kita nga nagapahinungod kana sa templo ni Solomon. “Apan ang gisalikway nga Bato ang nahimong Pangulo sa pamag-ang.” Ug ginasulti ko lang kini aron sa paghimo og usa—usa—usa—usa ka paghulagway para kaninyo.

⁴⁹ Karon, ug sa Biblia, nagapuyo na kita sa kaulahiang adlaw, sa ibabaw na sa piramide, sa nag-krus nga isda nga kapanahonang kanser diha sa zodiac, sa panahon sa pag-abot sa Leo nga leon, sa pangtaklub nga bato, ug sa mga adlaw sa pagkapinadayag sa mga anak sa Dios, diha sa Biblia, kita n’yo. Nakita n’yo ba kon asa na kita? Ania na kita mismo sa katapusang panahon.

⁵⁰ Pila man ang nakabasa sa mantalaan niining semanaha, bahin sa gisulti ni Khrushchev ug nilang uban pa? Oh, andam na kono sila; kita man usab. Amen. Andam na! Okey na ang tanan, kita n’yo. Oh, pagka—pagka—pagkaanindot nga pribilihiyo, pagkaanindot nga adlaw! Kung maamgo lang unta sa mga Cristohanon ang adlaw nga atong gikinabuhian! Pagkanindot gyud!

⁵¹ Unsa ma’y hunahuna n’yo? Ingon nga ang tagsulat niini nga Basahon, nakakita niini, ug nakita kon diin kini igapadayag sa kaulahiang mga adlaw, nagahulat ug nagaagulo alang niadtong mga anak sa Dios nga managpanungha sa kaulahiang mga adlaw, nga may gahum sa Espiritu Santo sa katapusan sa kapanahonan, aron ipadayag ang mga tinagong butang sukad pa kaniadto sa pagkatukod sa kalibutan, og aron ipahayag kini.

⁵² Karon balikan sa nato pag-usab “ang pagkatukod sa kalibutan”, aron makuha ang usa ka kapadayagan, og para hibaloong sab kung husto ba kita o dili. Dili unta ako mahimong mora’g nagapanamastamas sa pagtawag sa Dios og, “Papa,” apan gusto ko lang isulti kini sa ingon niana aron inyong masabtan kini. Papa! Gusto ni Papa og pipila ka mga anak kaniadto, busa unsa ma’y Iyang gibuhay? Miingon Siya, “Magkaaduna og mga Anghel.” Ug nanungha Sila nga nanag-alirong palibot Kaniya. Oh, pagkanindot niadto. Ilang gisimba Siya, kung ingon-niana Siya’y Dios na, nga usa sa mga kinaiyahan. Hinumdumi, Siya kaniadto mao si El (E-l), Elah, Elohim, nga nagalungtad-nga-nag-inusara, wala na’y unsa pa man gawas lamang Kaniya. Ang unang linalang nga mitungha mao ang mga Anghel. Dayon, wala na’y uban pang buhaton ang mga Anghel gawas lamang sa pagsimba. Dili Sila mahimong mahisalaag. Ug, dili sab Sila magmasakiton, tungod Sila’y imortal man nga mga linalang. Mao nga, dili pa Niya mapasundayag ang Iyang gahum sa pagpang-ayo, dili pa Niya mapasundayag ang Iyang pagpangluwas. Busa niadtong tungora, kaniadto, bueno atong. . .

⁵³ Dayon pagkahuman niadto, miingon Siya, “Magbuhat Kita og butang nga mahikap og makita.” Busa nagbuhat Siya og kalibutan. Ug sa nabuhat na Niya ang kalibutan, gibuhat na pud Niya ang tanang mga linalang sa yuta, ug pagkahuman gibuhat Niya ang tawo. Ang tanan-tanan nga mitungha gikan sa yuta, sugod sa usa—usa ka pitopito o usa ka bukya, nga pormang unod nga nagalutaw-lutaw sa tubig, sugod niana, hangtud sa . . . gikan niana paingon sa usa ka baki, nga mao ang pinakaubos nga matang sa kinabuhi nga atong mahikaplagan, ang ingon nila, mao ang baki. Ang pinakataas pud nga matang mao ang tawo. Nagsugod gikan sa baki paingon sa taluto, gikan sa taluto nagpadayon na kadto ug nagpadayon, ug sa matag higayon nga mosugod na ang Espiritu Santo sa pag “whoosh,” sa paghuyop, may motungha na usab nga kinabuhi; “whoosh,” og mas hataas na pud nga porma sa kinabuhi. Ug dayon, adunay mitungha nga ingon sa dagway sa Dios, mao na kadto ang tawo. Walay na’y sukad kaniadto, wala gyud kaniadto, og wala gayu’y sa palaabuton og unsa man nga paglalalangan, nga mas hataas pa kaysa tawo, tungod kay ang tawo man ang anaa sa dagway sa Dios. Kita n’yo?

⁵⁴ Dayon ang tawo, sa dihang gibuhat Niya ang Iyang unang tawo, kaniadto, sa dihang gibuhat Niya ang Iyang mga Anghel, gibuhat na pud Niya ang tawo, “Gilalang Niya sila nga lalaki ug babaye,” nga usa ra. Pareho siyang lalaki ug babaye, babaye ug lalaki. Sa dihang gibuhat Niya si Adan ug gipahimutang na siya sa lawas, hinumdumi, nga sa Genesis 1, gibuhat Niya siya nga lalaki ug babaye, ug sa Genesis 2, wala pa’y tawo kaniadto nga mag-uma sa yuta, nga tawong unod. Wala pa’y tawo nga mahimong mohawid og unsa man ug modaru sa yuta, apan aduna na kaniadto’y tawo nga sama sa Iyang dagway. “Ug ang Dios usa ka . . .” [Nagaingon ang kongregasyon, “Espiritu.”—Ed.]. Husto kana. Kita n’yo? Gibuhat Niya ang unang tawo, “gilalang Niya sila nga lalaki ug babaye.” Bueno, sa dihang gibuhat Niya ang unang tawo . . .

⁵⁵ Karon, hinumdumi n’yo, ang tanan-tanan niini atua na sa Iyang hunahuna. Ug nahisgotan ko na kana niadtong Dominggo sa gabii. Ang usa—usa ka pulong mao ang hunahuna nga napahayag. Gihunahuna sa Dios kung sa unsang paagi Siya mamahimo nga Dios, kung sa unsang paagi Siya pagasimbahon, kung sa unsang paagi Siya mamahimong usa ka Mananambal, og kung sa unsang paagi Siya mamahimong usa ka Manluluwas; ug sa dihadiha nga gisulti Niya ang Pulong, nan tapos na kadto tanan hangtud sa kahangturan. Oh, kung kining mga anak sa Dios karon mahimo lang unta nga manghawid sa maong Pulong nga sama niana! Tungod pagmosulti gani ang Dios og usa ka Pulong, mao na gyud kana! Sigurado gayud! Mahimong naghulat Siya . . . Ingon-ana ang ginasulti sa kronolohiya, o sa arkiyolohista ug tanan na, ginapamahayag nila nga tingali’g

minilyon ug minilyon milyon na kono ang edad sa kalibutan. Wala ako mahibalo, tingali'g trinilyon trilyon na gani ka mga tuig. Wala ako mahibalo kung unsa na ka dugay kini. Tungod wala man nagalungtad ang Dios sa oras. Wala ra gani Siya naminosan ni usa ka minuto sukad niadtong gilitok Niya kini. Siya'y Dios gayud hangtud karon. Walay oras diha Kaniya.

⁵⁶ Wala ako mahibalo nga ingon niana diay hangtud niadtong miaging gabii lang, o niadtong miaging buntag, diay. Ang pagka-Eternal, walay kagahapon, walay ugma, puro lang sa karon. Inyo bang nahimatikdan ang pulong nga “AKO MAO”? Dili nga “Ako kaniadto,” o “Ako sa umalabot,” kondili Eternal, “AKO MAO,” kita n'yo, “AKO MAO,” sa kanunay.

⁵⁷ Bueno, apan gusto man Niyang mapailalum ang mga butang sa oras. Gikinahanglan Niya nga mohimo og usa ka butang aron dunay mosimba, busa gihimo kini sa Iyang mga kinaiyahan. Dayon gibuhat Niya ang tawo. Pero, kini nga tawong lalaki, mora'g nagmasulob-on man siya. Busa, ania, aron maipakita ang Iyang gamhanang hunahuna, og kung unsa ang Iyang paghulagway mahitungod kang Cristo ug sa Iglesia, wala Siya mikuha og lahi nga yuta para sa pagbuhat sa tawong babaye, kondili mikuha ra Siya gikan sa kilid ni Adan, og usa ka gusok; ug gikuha kang Adan ang espiritu, nga pangbabaye, ug gipahimutang kadto sa niini nga gusok. Mao nga pagmakakita kamo og usa ka lalaking nagalihok nga mora og bayot, nan aduna gyu'y butang nga sayup. Ug pagmakakita sàb kamo og usa ka babayeng nagalihok nga sama sa usa ka lalaki, nan aduna gyu'y butang nga sayup. Kita n'yo, aduna gyu'y butang nga sayup. Tungod sila'y duha man ka managlahi nga mga espiritu, bug-os nga lahi gayud. Apan, ingon nga magkauban, nagakahimo sila nga usa ra, “kining duruha usa ra.” Ug mao kadto nga gibuhat Niya ang tawong babaye ug tawong lalaki, ug dili gyud sila kaniadto matigulang, dili mamatay, dili pud mamahimong ubanon, dili gayud. Nagakaon sila, nagainom sila, nagakatulog sila, nga sama ra kanato, pero wala pa sila nahibalo kaniadto kung unsa gayud ang sala.

⁵⁸ Karon molaktaw sà ko dinhi mismo para sa usa na usab ka hilisgotanan, mahitungod sa binhi sa serpente. Nga, ila akong gihangyo nga bakwion. Pero pag aduna ko'y makita nga moduol ug makapakita kanako og usa ka butang nga lahi. Nan gusto ko kanang masayran, kita n'yo.

⁵⁹ Bueno, apan human niadtong tanan, human nga nakasulod na ang sala, unsa ma'y nahitabo?

⁶⁰ Ngadto sa pinaka, itaas, nga usa ka milyon, usa ka gatus ka milyon ka milya ang kalay-on, adunay gintang nga *ingon-niana* ka halapad, ug mao kadto ang hingpit nga gugmang agapao. Pero sa matag higayon nga motikang kamo paingon *niini* nga direksyon, nagakahiktin kana og usa ka pulgada. Ug kabalo na

mo kung unsa ra kana ka gamay sa higayon nga modangat kana sa yuta. Kana'y landong man gud sa landong sa mga landong. Mao kana ang anaa kaninyo, mao pud kana ang anaa kanako, ang landong sa landong sa mga landong sa gugmang agapao.

⁶¹ Mao nga adunay sa kung unsang butang sa kinasuloran ninyo, may sa kung unsang butang sa kinasuloran sa matag babaye nga ania dinhi nga lagpas baynte na, may sa kung unsang butang sàb sa kinasuloran sa matag lalaki nga ania dinhi nga lagpas baynte na, nga nagapangandoy nga magpabilin. Tungod aduna lang man kamo'y lima ka tuig, gikan sa kinse anyos hangtud sa pagka-baynte. Pagmolagpas na og baynte ang edad n'yo nan hinay-hinay na kamong nagakamatay. Pero, gikan sa kinse anyos, batan-on pa gayud kamo hangtud nianang edara. Ug dayon nagakahamtong kamo hangtud inig ka baynte ninyo. Ug inig labay na og pagka-baynte, oh, moingon ka, "Usa gayud ako ka mahimsog pa nga tawo." Imo lang na'y sulti, pero dili ka na ingon-niana. Tungod nagakamatay na man ka ug nagakaut-ut ka na, bisan unsa pa'y imong buhaton. Hinoon gipangat ka pa sa Dios hangtud sa ingon-ana nga pangidaron, apan bisan pa man nagakamatay ka na. Karon unsa na ma'y mahitabo? Hinay-hinay ka na karon nga nagakamatay, pero dinha sa kinasuloran mo aduna'y butang nga nagaingon, "Gusto kong mamahimong dise-otso anyos pag-usab."

⁶² Karon aduna ko'y gustong ipangutana kaninyo. Unsa kaha kung nahimugso kamo lima ka gatus ka tuig na ang milabay, ug nagpabilin gihapon kamo sa pangidaron nga dise-otso anyos hangtud niining panahona? Ambot kung dili ba kaha kamo mahimong karaan na, sa inyong mga ideya nga sa kaniadto pang lima ka gatus ka tuig ang milabay! Kaniadtong wala pa miabot dinhi ang magpapanaw natong mga amahan, ug usa kamo ka batan-ong babaye nga dunay ingon niadto nga matang sa ideya. Aba, mas maayo gayud kon nagpadayon na lang unta kamo nga ingon-niadto ug natigulang ug nabuhi og lima ka gatus ka tuig. Kita n'yo, aduna gyu'y butang nga sayup.

⁶³ Moingon mo, "Bueno, sa pagka-karon maanindot kaayo ang akong pamati, Igsoong Branham. Oh, ako'y—ako'y—dise-otso pa man gud ko, dise-sais pa man gud ko, mao nga maanindot gyud ang akong pamati." Pinangga, sultihan tà ka og usa ka butang. Unsaon man nimo pagpakahibalo kon buhi pa ba ang imong inahan niining taknaa mismo, ingon nga wala siya dinhi sa simbahan karon? Unsaon man nimo pagpakahibalo nga wala namatay ang imong higalang lalaki pipila pa lang ka minutos ang milabay, o kaha ang imong higalang babaye? Unsaon man nimo pagpakahibalo nga inig ka buntag dili ka pa patay'ng lawas sulod sa imong balay? Unsaon man nimo pagpakahibalo kon makagawas ka ba dinhi sa simbahan karong gabhiona, nga buhi? Wala gayud kana'y kasigurohan. Walay unsa man nga sigurado. Kung ikaw ma'y kinse, dose, dise-nuebe,

setenta'y-singko, o kaha nubenta'y anyos, adunay . . . wala gyu'y kasigurohan ang tanan. Wala gani ka mahibalo dinha sa imong nahimutangan. Apan bisan pa niana nagapangandoy ka nga mahibalik sa pagka-kinse anyos, pagkadise-otso anyos. Unsa ma'y nagpahinungdan kanimo nga magtinguha og ingon niana?

⁶⁴ Karon, kung mahibalik man kamo sa pagkadise-otso anyos ug magpabilin nga ingon-ana, ug dili magmasakiton ug dili mamahimong . . . sigurarong makauban mo ang uban na pud nga mga tawo, tungod kay mangamatay na man sila, kita n'yo. Motaliwan na ang mga tawo sa ubang mga kapanahonan ug mamahimo ra kamong mga karaan na. Basin gani og mahimong mas grabe pa kamo kaysa kung matigulang kamo uban kanila. Apan aduna gyu'y butang nga nagatuaw kaninyo nga mamaatua didto. Mao kana ang gamay'ng agapao, kanang diyutay'ng landong nga nagapaaghat kaninyo . . . Butang nga anaa sa ibabaw dinhi.

⁶⁵ Bueno, niadtong miaging gabii, o niadtong miaging buntag diay, sa alas siete, sa diha nga ang Balaang Espiritu, sa Iyang pagkamaayo ug sa Iyang grasya, gikuha ako gikan niining lawasa, nagatoo ko, nagatoo gyud ko. Kon mao man o dili, dili ko makasulti, basta nakaadto gyud ko niadtong Yuta ug nakita kadto nga mga tawo, ug mga batan-on silang tanan. Ug nakita ko ang pinakamatahum nga mga tawo nga akong nakita sukad-sukad sa tibuok kong kinabuhi. Ug miingon Siya kanako, "Ang uban kanila nubenta'y anyos na kaniadto. Sila mao ang imong mga kinabig. Mao nga ayaw'g katingala nga nanagsinggit sila, 'Igsoon ko! Igsoon ko!'"

⁶⁶ Bueno, usa kana ka langitnon nga lawas, nga pagmamatay kita dili kita mamahimong sugilanon na lang, kondili mamahimo kitang lawas. Ngani kung kita, ang matag usa kanato, mamatay man, kung mabuthan man kita og bomba atomika niining taknaa mismo, nan sulod sa lima ka minuto gikan karon maglamanohay na kita sa usa'g usa ug maghinangopay sa usa'g usa, ug managsinggit ug magkasadya, ug magahimaya sa Dios! Oo, sir. Ug si Igsoong lalaki ug Igsoong babayeng Spencer nga nanaglingkod dinhi, siguro sila ang usa sa pinakatigulang nga mga magtiayon dinhi, mamahimo na sila nga dise-otso anyos, baynte anyos ang pangidaron. Si Igsoong Neville mamahimo usab nga usa na ka batan-ong lalaki, ug ako sàb mamahimo na nga batan-ong lalaki. Ug kitang tanan gayud mamahimong . . . Mao gayud kini ang Kamatuoran. "Kung kining yutan-ong tabernakulo nga puloy-anan matun-as man, aduna na kita'y usa nga nagahulat."

⁶⁷ Sa diha nga mogawas na ang usa ka masuso gikan sa inahan niini, diha sa natural nga paghimugso, molihok-lihok ang gamay'ng lawas niini ug mosikad-sikad ang mga bitiis, ug uban pa. Pasayloa ko sa maong sinultihan, kaninyo nga mga batan-on pa nga kababayen-an. Apan, sa diha nga mahimugso

na ang maong masuso, aduna kini og mga muskulo nga nagalihok-lihok. Ug inig tunga na niini sa kalibutan, ang unang butang, magkaaduna kini og gininhawa, ug aduna usab og espirituhanong lawas sa kinaiyahan nga mosulod sa maong masuso nianang tungora mismo. Kung pasagdan mo lang kini, ilihok niini ang gamay'ng ulo niini ug magpauraray kini mismo sa dughan sa iyang inahan ug mosugod na sa pagsuso. Kung dili niya buhaton ang ingon-ana, dili pud molugwa ang gatas.

⁶⁸ Namatikdan ba ninyo ang usa ka nating baka sa diha nga ihmugso kana, kana'y... sa dihadiha nga aduna na kana'y igong kusog para makatindog? Kinsa ma'y nagasulti niana? Molakaw ra kana mismo paingon sa iyang inahan, mosugod sa pagpauraray ug hinay-hinay nga mosuso. Oh, bitaw!

⁶⁹ Kay, sa diha nga ihmugso na kining yutan-ong lawas dinhi, aduna usab og usa ka espirituhanong lawas nga nahiandam na para niini. Ug sa diha nga kining... Oh, alleluyah! "Ug kung kining yutan-ong tabernakulo nga puloy-anan matun-as man, aduna na'y usa nga nagahulat didto." Sa dihadiha nga mobiya na kita niining lawasa, nan magasulod na kita nianang usa pa; kana nga lawas dili na magtinguha og bugnaw'ng mainom nga tubig, dili na kinahanglan pa nga moinom og tubig; wala na kana magakaon, og dili sàb kana ginama gikan sa abog sa yuta. Kondili kana'y tinuod mismo nga lawas, ug makahimong mobati ug magpakiglamano, ug nagahigugma mismo ug ang tanan-tanan niini hingpit gayud. Ug kanang lawasa nagahulat na didto. Kana'y kabahin niini. Aduna ma'y tulo niana.

⁷⁰ Ginasugdan n'yo ang inyong Kinabuhing Walay Katapusan dinhi mismo sa altar. Dinhi n'yo ginasugdan ang Eternidad. Oh! Dinhi mo mismo ginasugdan ang Kinabuhing Walay Katapusan. Dayon matawo ka pag-usab, ingon nga usa ka anak sa Dios. Ug dayon pag mamatay ka, mosugod ka nang... Pag moabot na kanimo ang imong kamatayon dinhi niini nga lawas ug mohunong na sa pagpitik ang kasingkasing, ug hinay-hinay na usab nga mohunong ang mga ligid sa pagka-mortal, og kanang diyutay'ng landong nga usa ka landong sa landong, sa usa ra ka segundo mamahimo kanang landong sa landong, dayon ang sunod mamahimo kana nga landong na mismo, dayon ang sunod mamahimo kanang usa ka gamay'ng tinulo, dayon ang sunod mamahimo kanang usa ka sapa, dayon ang sunod mamahimo kanang usa ka suba, ug pagkasunod mamahimo na kana nga kadagatan, ug dili magdugay maanaa ka na sa atubangan sa imong mga minahal sa kinabuhi nga atua didto, nabistihan na og bisti nga langitnong lawas, og kaila gyud ninyo ang usa'g usa, ginahigugma ang usa'g usa, og nahibalik na kamo sa pagkabatan-ong lalaki ug batan-ong babaye pag-usab. Tinuod gayud. Magahulat kini didto hangtud sa pag-abot ni Ginoong Jesus. Ug sa umaabot nga adlaw ang Iyang gihimayang lawas... Karon hinumdumi n'yo, nga usa kana ka langitnong lawas, dili

nga usa ka gihimaya, kondili usa ka langitnon nga lawas. Ug sa umaabot nga adlaw mobiya sa Langit kana nga langitnong lawas nga kauban si Jesus.

⁷¹ “Kay sultihan ko kamo niini,” Ikaduhang Mga Taga-Tesalonica, sa ika-5 nga kapitulo, o Unang Mga Taga-Tesalonica, sa ika-5 nga kapitulo, ang usa ba kaha o ang usa pa, “Sultihan ko kamo, dili ko buut nga dili kamo mahibalo, mga igsoon, mahitungod sa kadtong mga nangamatay, aron dili kamo managsubo, bisan ingon sa uban nga walay paglaum. Kay kung kita nagatoo man nga si Cristo namatay ug nabanhaw sa ikatulong adlaw, ingon man usab kadtong mga nangamatay diha kang Cristo pagadad-on ra sa Dios uban Kaniya. Kay kini ginaingon namo kaninyo sumala sa mga sugo sa Ginoo, nga kita nga mga buhi ug nanghibilin hangtud sa pag-abot sa Ginoo, dili magauna o magapugong” (ang pinakamaayong pulong) “magapugong kanila nga nangamatay. Kay ang trumpeta sa Dios patingogon, ug ang mga nangamatay diha kang Cristo mouna sa pagpamangon.” Kining langitnon nga mga lawas mokanaug ra unya ug magasul-ob og yutan-ong, gihimayang mga lawas. “Ug kita nga mga buhi pa ug nanghibilin mangausab sa kalit lang, sa usa ka pagpamilok, ug pagalalinon pagtingub uban kanila, aron sa pagsugat sa Ginoo diha sa kawanangan.”

⁷² “Ako dili na moinom niining gikan sa bunga sa parras ni mokaon man hangtud nga magakaon Ako niini pag-usab diha sa Ginghamarian sa Akong Amahan,” sa pang-Kasal nga Panihapon. Sulod sa tulo ka tuig ug tunga pagatapuson sa anti-cristo ang iyang paghari, pagalaglagon ang tibuok kalibutan, pagatawgon ang mga Judio, og igapaila ni Joseph ang iyang kaugalingon ngadto sa mga Gentil, o sa mga Judio diay. Hinumdumi n’yo, kaniadtong gipaila na ni Joseph ang iyang kaugalingon ngadto sa mga igsoon niya, walay ni usa ka Gentil ang atua didto. Kaniadtong iyang gipasugoan. . . Kabalo na man mo sa maong estorya. Si Joseph, nga hingpit nga tipo ni Cristo, sa tanang bahin. Ug kaniadtong gipasugoan ni Joseph ang iyang mga igsoon, ug sa nangadto na sila didto, ug mitan-aw siya ug nakita ang batan-ong si Benjamin, ug nakita niya sila didto ug dayon iyang. . . Miingon sila, “Aba, kini nga tawo! Wala gyud unta nato—nato gipatay ang atong igsoong, si Joseph.” Ingon-ana pag maamgo na sa mga Judio nga nasayup sila; bueno pag si Cristo usab, sa dihang ipaila na Niya ang Iyang Kaugalingon ngadto kanila. Ug dili na gayud makapugong si Joseph kaniadto, siya’y kahalakon na gyud, halos, busa gipapahawa sa niya ang iyang asawa ug ang iyang mga anak, ug ang tanang mga tigbantay ug tanan nang uban pa, ug gipaadto sa sila sa palasyo. Tinuod gayud. Ug pagkahuman sa atubangan sa mga Judio na lamang, ingon siya, “Ako mao si Joseph, ang inyong igsoon. Ako mao ang inyong igsoon.” Ug niadtong tungora nanghapa sila ug nangurog, nga miingon, “Karon nasayod na kita nga mapaninglan gyud ta,

tungod kay gipatay man nato ang atong igsoon. Miingon tà nga gipatay na nato ang atong igsoon, ug ania siya man diay kining bantugan nga hari.”

⁷³ Miingon siya, “Gibuhat kadto sa Dios alang sa usa ka katuyoan, aron magluwas og kinabuhi.” Eksaktong mao gyud kana ang hinungdan nga gibuhat kadto sa Dios, aron luwason kita nga mga Gentil. Mao nga ang mga Gentil atua na sa palasyo kaniadto. Alleluyah! Ingon nga gisalikway sa Iyang mga igsoon, si Joseph, mikuha Siya og usa ka Pangasaw-onon; ug ang maong Pangasaw-onon usa ka Gentil, dili nga usa ka Judio. Oo.

⁷⁴ Bueno, asa na kamo paingon karon? Human natong maisul-ob kining mahimayaon nga lawas, ug sa halangdong kapanahonan nga umalabot; sa diha nga kining gihimayang lawas, kining langitnong lawas gihimo nang usa ka gihimayang lawas. Nasabtan n’yo ba ang buut kong ipasabot karon? Kung ingon-niana mahimo akong moduol ug moingon, “Igsoong Neville!” Hatagan ko kamo og usa ka diyutay’ng paghulagway. Moingon ko, “Igsoong Humes, moadto kita kang Papa karong buntaga.” Siya’y Dios. Karon naila nato Siya, nga usa Siya ka Manluluwas, usa pud Siya ka Mananambal.

⁷⁵ Wala gayud sukad og ingon nianang butang sama sa paglalang sa sala. Wala gyu’y makadawat niana, dili ba? Ang sala dili man usa ka binuhat. Dili, sir! Ang sala usa lang ka pagtuis. Tungod aduna ma’y usa lang ka Magbubuhay, kana mao ang Dios. Ang sala mao’y pagkamatarung nga gituis lang. Unsa man ang pagpanapaw? Ang pagkamatarung nga gituis lang. Unsa man ang bakak? Ang kamatuoran nga gituis lang. Mao gayud. Unsa man ang usa ka tunglo nga pulong? Kini’y mga panalangin sa Dios nga gihimong tunglo nga pulong sa Dios, imbis nga usa ka panalangin. Ang sala dili usa ka binuhat. Ang sala usa lang ka pagpangtuis. Busa, si Satanas dili makalalang og sala, kondili gituis lang niya kung unsay gilalang sa Dios. Eksakto gayud. Ang kamatayon sàb usa lamang ka pagtuis sa kinabuhi.

⁷⁶ Karon, himatikdi kini—himatikdi kini. Dayon moduol ako, ug moingon ko, “Igsoong Humes, ikaw ug ako, ug si Igsoong Beeler ug ang pipila sa mga kaigsoonan, moadto kita kang Papa Dios. Ug, ingnon tà, nga mopanaw kita sa makadiyut. Kamong mga kalalaken-an ganahan baya og mga kabukiran kaniadtong kamo...”

“Oo, ganahan gyud bitaw mì.”

⁷⁷ “Oh, pipila ka milyong milya ang kalapdon niana didto sa bag-ong kalibutan. Pero moadto tà, og maglakaw-lakaw didto.”

⁷⁸ “Kinahanglan kong...?...sa matag adlaw, nga mosubang ang adlaw. Dunggon Ko kamo. Samtang sila nagasulti pa, Ako nagapamati na.” Isaias 66. Husto kana.

⁷⁹ Ug kabalo mo, magalakaw-lakaw ako didto, kitang tanan magalakaw-lakaw didto sulod sa mga lima ka gatus ka tuig, diyutay ra kana nga pagpanaw didto, bisan usa pa ka milyon ka tuig, wala ra'y diperensya, kita n'yo. Ug karon—karon mora'g hinangal kanang paminawon, apan tinuod kana. Kita n'yo, tinuod gyud kana, tungod wala na man didto'y oras, kondili Eternidad na. Ug pag moadto ako didto, maglakaw-lakaw ko didto, ug kabalo ba mo kung kinsa ang akong—akong—akong mahinagbo didto? Moingon ko, “Bueno, ambot kung dili ba kana si Igsoong Georgie Bruce! Aba, Igsoong Georgie, dugay na nga panahon sukad niadtong nakita ta ka.” Mora gyud siya og sama ra kaniadto. Kita n'yo? Mahimong napulo ka milyon ka tuig na ang iyang pangidaron, apan siya'y batan-on gihapon nga sama kaniadto. Ginahapuhap niya ang likod sa kung kinsa man didto, ug pagtan-aw ko, Cheetah man diay kadto, og leon.

Moingon pud ko, “Kumusta man ka karong buntaga, Cheetah?”

⁸⁰ “Meow,” nga sama ra sa usa ka gamay'ng iring. “Oh, nadugayan ako didto nga nakig-istorya sa pipila ka mga igsoong babaye sa palibot niadtong dagkung mga bulak didto dapit, atua kami didto nga mga lima ka gatus ka tuig, kita n'yo, nga nagalantaw-lantaw lang sa palibot.” Bueno, mora'g hinangal kanang paminawon, apan tinuod kana. Eksakto gayud kana. Ingon niana man ang plano sa Dios.

⁸¹ Bueno, panalanginan ang imong kasingkasing, Igsoong Georgie. Wala na unya'y kadaut nga mahimong moabot, wala na gayud. Sa panahon sa kagabhion moadto kita ibabaw sa bukid, ug moingon, “Oh Papa Dios, ako kaniadto nahisalaag. Oh, ako kaniadto anaa sa lapuk sa kasal-anan, Papa Dios, ug giluwes Mo ako.”

⁸² Aba, nangabuang man gani ang mga tawo nga naninguha sa pagpahayag niana. Bueno, kadtong tawo nga misulat sa kaulahiang berso nianang *O Love Of God*, didto kana gisulat sa pader sa institusyon sa mga buang, sa pagpaninguhang ipahayag ang gugma sa Dios. Kung unsa nga nagpaubos Siya aron lang nga luwason ang mga makasasala, ug kung unsa nga gibuhat Niya, nga ipakanaug ang Iyang gugma aron luwason kamo ug ako. Kung pagsimba ang pagahisgotan, ang mga Anghel wala gyu'y unsa man nga hingsayran mahitungod niini! Kon sa pagsimba, ang nahibaloan lang sa Anghel. . . anaa lang Siya dinha nga nagakapay-kapay sa Iyang mga pako, ug nagalupad-lupad, “Alleluyah! Alleluyah!” Apan, oh, tungod sa kalooy! Paghisgotan na ang pagkasayod nga ako kaniadto nahisalaag ug karon ako hingkaplapan, ako kaniadto namatay, og ako nabuhi pag-usab! Oh Dios, ako kaniadto anaa sa kasal-anan, ako kaniadto anaa sa lapuk, ug atua ako kaniadto sa basurahan!

⁸³ Pero ania ang pinakamaayo nga maihatag kaninyo sa

kinabuhi. Nakaadto na ba mo sa basurahan sa Colgate dinhi? Mao kadto ang pinakabaho nga lugar nga akong naadtoan sukad-sukad. Kasukaon gyud ko sa dihang masimhotan ko kadtong mabaho nga aso. Pag atua ka didto sa palibot niadtong baho nga aso, kasukaon gyud ka, nga daw sa mabaliktad ang sulod sa imong tiyan, nga mora'g nag-inom ka og castor oil. Kita n'yo, kasukaon gyud ka! Ug may mga ilaga pa gyud nga nagadagan-dagan sa imong palibot, gapaninguhang mopahit kanimo. Ug mao kana ang pinakamaayo niining kinabuhi. Ug dayon adunay mikab-ot ug mikuha kanimo. Ug tigulang ka na kaayo ug dili mo na matabangan ang imong kaugalingon. Pero basta na lang kang gisabnit ug gihimo kang usa ka batan-ong lalaki nga dise-otso anyos ang panuigon, gipapahimutang ka diha ibabaw sa bukid, nga anaa sa pinaka-mahimsog nga hugna sa imong panglawas, pagkanindot gyud, nga nagahanggab og limpyo'ng presko nga hangin nga sama niana, nagainom og maayo og mabugnaw nga tubig. Unya gusto pa ba nimong mobalik pag-usab diha nianang basurahan? Dili, dili, dili, dili na gayud ka mobalik pa ngadto nianang basurahan.

⁸⁴ Bueno, mao kana ang kahulogan niadto, higala. Mao kana ang kahulogan niadtong panan-awon, o paglalin, unsa man kadto, o usa ka panan-awon diay. Isulti ko lang nga panan-awon, tungod kay nabalaka ko basin adunay mapandol kon moingon ko nga paglalin, pero mao gayud kana. Bueno, mao kadto ang higayon nga ang Dios . . . kung unsay gibuhath sa Dios aron madala ang mga anak nga lalaki ug mga anak nga babaye ngadto Kaniya. Karon, si kinsa ba kini nga mga tawo? Giunsa man nila . . . Unsa ba'y gibuhath niini nga mga tawo para mamahimong takus niini? Sa unsa ba nga paagi nga nahimo silang takus niini? Ang Dios, sa sinugdan pa lang, sa wala pa kaniadto gilalang ang usa ka Anghel . . . Pila man ang nasayod nga Siya walay-kinutoban? Kay kung Siya'y dili ingon niana, nan dili Siya Dios. Busa, ang Dios, sa Iyang walay-kinutoban nga kalooy, nakita na Niya nga buhaton kadto ni Lucifer, kung lalangon man Niya kini. Pero gipahimutang Niya sila nga may gawasnon nga kinaugalingong kabubut-on, sa ingon niana nga basihanan. Ug bisan sa karon anaa man sàb sa gihapon kamo dinha, tinuod kana, ang punoan sa husto ug sayup napahimutang usab sa atubangan sa matag usa kanato, para sa inyong pagpili. Ug si Lucifer ang pinaka una nga mipili sa sayup nga dalanon. Ug hinay-hinay siya nga nangdani og mga mosunod kaniya, nga mahakogon, gapaninguhang angkonon ang tanan para sa iyang kaugalingon, og gapaninguhang labwan ang si kinsa pa man. Ug dinha kadto nagsugod. Karon, paminawa n'yo kini. Dinha nagsugod ang sala. Pero ang Dios, sa Iyang walay-kinutoban nga hunahuna, nakita na Niya kadto, ug nakita na ang bugtong paagi . . .

⁸⁵ Karon, kaninyo nga mga kaigsoonang trinitarian, dili ko

baya tinguha nga pasakitan kamo, apan sa Ngalan sa maayong Pulong sa Dios giunsa man nga gihimo n'yo si Jesus ingon nga usa ka lahi nga persona sa Dios Mismo? Kung mogamit man gani si Jesus og uban ug ipadala kini para mao'y mamatay, aron luwason ang tawo dinhi, nan mamahimo Siyang dili-matarung. Aduna lang gyu'y usa ka paagi nga mabuhat kadto sa Dios, kana mao'y Siya Mismo ang mohimo sa maong katungdanan! Ug mao nga nahimong unod ang Dios aron Iyang masinati ang mga kasakit sa kamatayon, aron wagtangan ang ikot ug ang kamatayon gikan kanato, aron nga kita matubos Niya Mismo. Mao kana'y hinungdan kon ngano nga bug-os gyud Siyang pagasimbahon. Hinoon usa ka tawo si Jesus, Siya mao gayud. Usa Siya ka tawo, t-a-w-o, nga gipanganak sa birheng Maria. Apan ang Espiritu nga anaa Kaniya mao man ang Dios nga walay sukod, diha Kaniya nagapuyo sa pagkalawas ang bug-os kinatibuk-an sa Pagka-Dios. Siya mao si Jehovah-jireh, Siya mao si Jehovah-rapha, Siya mao sàb si Jehovah-manasses, Siya si Jehovah; ang atong Kalasag, ang atong Taming, ang atong Mananambal; Siya mao ang Alfa, Omega, ang Sinugdanan ug ang Katapusan; Siya mao ang Una, ang Kaulahian; Siya mao ang Kaniadto, Ang Karon, ug Ang Umalabot; ang Gamut ug Kaliwat ni David, ang Bitoon sa Kabuntagon, aba, Siya gayud ang Tanan-tanan. Diha Kaniya nagapuyo man sa pagkalawas ang bug-os kinatibuk-an sa Pagka-Dios!

⁸⁶ Ug kanunay nang adunay ikot ang kamatayon, nga ginasakit niini ang mga tawo, “Ah,” moingon ang yawa, “Nagunitan na gyud tà ka, tungod kay naminaw man ka kanako. Pagasakiton ko ikaw, ibalhog ko ikaw sa lubnganan. Wala gyu'y unsa man nga maitabang kanimo kanang dugo sa karnero, dugo ra man kana sa hayop.” Apan ang Dios, sa Iyang kaalam, nasayod na nga aduna gyu'y moabot nga usa ka Cordero, nga gipatay sukad pa sa pagkatukod sa kalibutan. Oo, sir. Ug sila . . . Naghulat Siya alang nianang panahona, nga moabot ang kahupnganan sa panahon.

⁸⁷ Apan usa ka adlaw sa diha nga miabot kining Cordero, kini nga Tawo, nalimbongan gayud si Satanas. Mitan-aw siya Kaniya, ingon siya, “Kung Ikaw ang Anak sa Dios, nan buhata *kini*. Kung Ikaw ang Anak sa Dios, pagbuhat gani og milagro ug ipakita kanako nga ginabuhat Mo kana. Ipakita kanako nga ginabuhat Mo kana. Uh-huh, tabonan ko og trapo ang tibuok Mong nawong, og bunalan Ka. Kung usa Ikaw ka propeta, sultihi kami kung kinsay nagbunal Kanimo.” Hum! “Wala ko—wala gyud ko nagatoo nga Ikaw mao Siya. Kung Ikaw man gani, nan diretsahan nga isulti kanamo kung sa unsang paagi nga Ikaw mao Siya.” Kita n'yo, tanan nang ingon-niana. “Oh, sultihi kami nga Ikaw mao gayud Siya!” Wala Niya gibuka ang Iyang baba. Oh, oh, gilipat gayud Niya ang maong tawo niadtong tungora!

⁸⁸ Mitan-aw Siya ngadto sa tinun-an, ug miingon, “Mahimo Kong makigsulti sa Akong Amahan ug Iyang ipadala Kanako

ang napulo'g duha ka dagkung panon sa mga Manulonda, kung gustohon Ko.” Pero wala kadto nadungog ni Pilato, kabalo mo.

⁸⁹ “Kung Ikaw man! Kung Ikaw man. Oh, dili gyud Siya kana. Aba, tan-awa n’yo gani Siya nga nagkadugo. Aba, ang pila kaninyo nga mga sundalo adto mo didto ug lud-i ang Iyang nawong.” Gilud-an, og gibugalbugalan Siya, gibira pa gyud ang mga balbas sa Iyang nawong. “Oh, dili man diay Siya kana! Dili, dili gyud Siya kana! Ipataup ko ang akong ikot diha Kaniya, sige. Ibalhog ko Siya didto. Mapukan na gyud ta Ka karon!”

⁹⁰ Sa kaulahian mituaw na Siya, “Eli! Eli! Dios Ko! Dios Ko!” Usa kadto ka tawo. “Nganong gibiyaan Mo Ako?”

⁹¹ Sa tanaman sa Gethsemane, mibiya Kaniya ang pagdihog, kabalo na mo, tungod kinahanglan man Niyang mamatay kaniadto ingon nga usa ka makasasala. Namatay Siya ingon nga usa ka makasasala, kabalo na man mo niana; dili nga Iyang mga sala, kondili ang sa akoa ug sa inyoha. Didto miabot ang maong gugma, kon daw sa unsa nga giako Niya ang sa akoa! Oh, Alleluyah! Giako gayud Niya ang akong mga sala!

⁹² Ug atua Siya, dili Niya mabuka ang Iyang baba. Miingon ang ikot, “Kabalo ka, nagatoo ko nga usa lamang kana ka ordinaryo nga tawo. Dili gyud diay Siya gipanganak sa ulay, kay napataup ko man lagi ang akong ikot diha Kaniya.”

⁹³ Ug ania miabot kini, gipataup ang ikot niini diha Kaniya, apan sayup gyud kadto higayon, aba! Dili na mabira balik ang ikot niini. Mao nga dili na kini makapamaak pa sukad niadto, tungod nabiyaan na man didto ang ikot niini. Siya nabanhaw sa ikatulong adlaw, ug miingon, “Ako Mao ang namatay, ug nabuhi pag-usab, ug buhi hangtud sa kahangturan, ania Kanako ang mga yawi sa kamatayon ug impiyerno.” Oo, sir. Napakyas si Satanas nga makita kung si Kinsa ba gyud kadto. “Ug tungod kay Ako buhi, kamo usab mabuhi. Pero wala pa ikapadayag . . .”

⁹⁴ Usa ka adlaw, tulo o upat ka adlaw human niadto, pagkahuman Niyang mikayab ngadto sa Amahan, dayon sa nakabalik na, ang uban miingon, “Oh, Siya’y usa ka . . . Siya—Siya siguradong usa gayud ka multo. Daw sa may makahahadlok gayud nga butang nianang Tawhana. Ug kita . . . Nakita n’yo Siya. Nakita n’yo ang maong talan-awon.”

“Dili, Siya gayud si Jesus.”

⁹⁵ Miingon pud si Tomas, “Tan-awon ko una ang Iyang mga kamot ug tanan na, dayon sultihan ko kamo kung mao ba gayud.”

⁹⁶ Miingon si Jesus, “Ania Ako.” Ingon pa, “Aduna ba kamo’y isda ug tinapay dinha? Hatagi n’yo Ako og tinapay.” Ug ilang gihatagan Siya og tinapay, ug mitindog Siya didto ug gikaon kadto. Miingon, “Karon, ang usa ka espiritu nagakaon ba sama Kanako? Aduna ba’y unod ug mga bukog ang usa ka espiritu

sama sa anaa Kanako?” Kita n’yo? Ingon Siya, “Ako mao Siya. Ako gyud kini.”

⁹⁷ Ug miingon si Pablo, “Wala pa ikapadayag kung unsa gayud ang matang sa lawas nga atong mabatonan, apan kita nasayod nga magkaaduna unya kita og lawas nga sama sa Iyaha.” Unsa? Nagkaaduna ba gyud Siya kaniadto og theophany nga lawas? Oo, sir! Ngani sa pagkamatay Niya kaniadto, ang Biblia miingon nga “Siya,” usa ka personal nga puli-ngalan na usab, “Miadto Siya sa impiyerno ug nagwali ngadto sa mga kalag nga anaa sa bilanggoan.” Alleluyah! Giunsa man Niya pagbuhat kadto? Ingon nga aduna Siya’y mga sensya sa pagbati, aduna Siya’y mga sensya sa pandungog, aduna Siya’y mga sensya sa pagpanulti, nagwali Siya pinaagi niadtong mao ra nga matang sa lawas nga sama niadtong sa mga gihimaya na nga nakita ko niadtong miaging gabii. Nagwali Siya ngadto sa mga kalag nga atua sa impiyerno, nga wala naghinulsol niadtong pagkamapailubong mga adlaw ni Noe.

⁹⁸ Apan sa diha nga nabanhaw Siya niadtong Pasko sa Pagkabanhaw, tungod dili man mahimo nga kadtong lawasa makakita og pagkadunot, kay nakita na man kadto ni David nga propeta, “Dili Ko pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot. Dugang pa niana ang Akong unod magapahulay diha sa paglaum, tungod kay dili man Niya pagabiyaan ang Akong kalag didto sa sheol, ni dili Niya pagabiyaan ang Akong Balaan nga makakita og pagkadunot.” Ug sulod sa setenta’y-dos oras sa wala pa misugod ang pagkadunot, nabanhaw na, kadtong theophany, kadtong lawas nga miadto ug nagwali sa mga kalag nga atua sa bilanggoan, nga wala naghinulsol niadtong pagkamapailubong mga adlaw ni Noe, ug ang may-kamatayon nag-ilis og walay-kamatayon, ug mitindog Siya ug mikaon Siya, ug gisulti Niya kanato nga usa Siya ka Tawo. Alleluyah!

⁹⁹ Sa ingon-anang paagi nga makita nato Siya, Igsoong Evans. Mao kana ang higayon nga magalingkod Siya sa trono ni David. Alleluyah! Mao sàb kana ang higayon nga magalakaw-lakaw kita, og mobiyahe ako nga kauban kamo latas sa mga kabukiran sulod sa usa ka milyon ka tuig, kita n’yo, og sulod sa pipila lang ka adlaw, sa pipila lang ka minuto, motabok na pud tà didto, og magalingkod-lingkod tà didto.

¹⁰⁰ Ug pag oras na para mokaon, kabalo mo, sa kalit lang, moingon si Igsoong babayeng Wood. . . Moingon ko, “Igsoong Wood, bueno, diin ka ba gikan hangtud niining panahona? Wala man gud tà ka nakita sulod sa . . . pero sa tan-aw ko mora’g kinse minutos pa man.”

“Oh, duha ka libo ka tuig na man ang milabay, Igsoong Branham.”

101 “Uh-huh. Kumusta ang imong gibati?” Oh, siyempre wala man ka’y laing bation didto kondili maayo gayud.

102 “Bueno, umari kamong, mga kalalaken-an, aduna ko’y ipakita kaninyong tanan, mga igsoon, mga pinalangga kong igsoon. Aniyay tuboran sa tubig dinhi, ang pinakamaayo nga inyong mainom sukad-sukad. Ug, oh, moinom kita niining maayo og mabugnaw nga tubig. Mangab-ot pud ko didto ug manguha og dagkung mga pungpong sa ubas, ug manglingkod kitang tanan didto ug mangaon niini.” Dili ba pagkaanindot gayud? Eksaktong ingon niana kini. Mao gayud.

103 Giunsa man nato pagpakabaton niini? Giunsa man nato pagpakahibalo niini? Ang Dios, sa wala pa ang pagkatukod sa kalibutan, gipili na kitang daan! Si kinsa? Kadtong mga maanaa sa Yutang saad.

*...kita gipili nang daan aron mahimong mga anak
nga sinagop pinaagi kang Jesus Cristo...sumala sa
iyang tuyo sa iyang kabubut-on,*

Alang sa mga pagdayeg sa Iyang himaya...

Aron nga dayegon nato Siya sama sa Iyang gikaingon. Ingon niana Siya, Dios. Mao nga tinguhaon gyud natong dayegon Siya.

*...mga pagdayeg sa iyang himaya sa iyang grasya,
nga sa walay-bayad gihatag niya kanato diha sa
hinigugma. (Diha kang Cristo kita gidawat.)*

*Diha kaniya kita may katubsananan pinaagi sa dugo,
ang kapasayloan alang sa atong mga p-a-g-l-a-p-a-s...*

104 Kinahanglan ko pang balikan ang bahin sa pagsagop, apan buut kong mohunong sa dinhi mahitungod sa “mga sala” sa makadiyut. “Mga sala,” namatikdan ba ninyo kana? Kabalo ba mo nga dili ginakondena sa Dios ang usa ka makasasala tungod sa pagpakasala? Kondili ginakondena Niya kini tungod sa pagka-makasasala. Kung manigarilyo man ang usa ka makasasala, dili Niya kini ginakondena tungod niana; usa na man siya ka makasasala, bisan unsaon. Kita n’yo? Kita n’yo? Wala siya’y unsa man nga mga sala, ang usa ka makasasala. Siya’y usa gayud ka makasasala, kita n’yo, wala siya’y unsa man nga mga sala. Apan magkaaduna kamo og sala, kamo nga mga Cristohanon. Matikdi n’yo dinhi nga nagapakigsulti si Pablo ngadto sa Iglesia. Ginasigurado nga matarung kini. Kita n’yo? Kita n’yo? “Kapasayloan sa mga sala,” m-g-a s-a-l-a. Hinoon makahimo kita og sala. Apan ang makasasala usa na gayud ka makasasala, dili siya mapasaylo sa Dios.

105 Karon, moingon mo, “Bueno, mianhi siya dinhi ug gipusil ang usa ka tawo. Unsa ma’y imong buhaton mahitungod niini?” Wala ako’y labot niana. Dili man ko usa ka repormador, usa ako ka magwawali. Ang balaod na ang bahala niana, sila man ang mga tigreporma. Sila’y...“Bueno,” ingnon ta,

“nakapanapaw siya.” Kana, kana—anaa na kana sa balaod. Anaa na kana tali kaniya ug sa balaod. Ako—ako—ako—dili ako usa ka repormador, dili ako ang nagapagbag-o sa mga tawo. Kondili ginatinguha ko nga mangakabig unta sila. Ingon nga usa ako ka magwawali, kita n’yo, buluhaton ko ang madala sila paingon sa Dios. Kung nakasala siya, nan iya na kanang tulubagon, ingon nga usa siya ka makasasala. Ginakondena siya sa Dios sa mas hataas nga hugna. Siya’y usa na ka makasasala sa sugod pa lang, siya’y hinukman na sa sugod pa lang. Wala pa gani siya nakafirst base sukad, siya—siya—siya’y impas na gyud. Usa man siya ka makasasala sa sugod pa lang. Wala siya’y unsa man nga mga sala, tungod siya’y usa man ka makasasala mismo.

¹⁰⁶ Dili ka puedeng mogawas ug moingon, “Ang *ingon niini* kangitngit mao ang gabii, ug ang *ingon niini* usab kangitngit dili gabii.” Dili, puro kana gabii, puro mismo gabii. Mao kana’y giingon sa Dios. Husto kana, usa mismo siya ka makasasala, kana lang. “Bueno, gibuhath niya ang ingon-ini, ang *ingon niini* kangitngit maoy gabii, *kining* medyo madan-ag-dan-ag pa dili gyud ingon nga gabii.” Kabalo ko, apan puro gayud kana gabii, kana lang. Kita n’yo?

¹⁰⁷ Dili sàb ko makaingon, “Ang *ingon niini* kahayag mao ang kahayag.” Dili, puro kana kahayag, kita n’yo, kahayag gayud, dili ka makaingon nga kahayag kini tungod kay mas labi ang kahayag niini. Kita n’yo? Apan kung may itum siya nga bahin *dinhi*, nan aduna gyu’y kangitngit niini.

¹⁰⁸ Busa ang “mga sala,” m-g-a s-a-l-a, kita may kapasayloan sa atong mga sala pinaagi sa Iyang (unsa man?) Dugo, hamiling Dugo.

. . . *sumala sa kadagaya sa iyang* . . .

¹⁰⁹ Unsaon man nato sa paghikalimot niini? Tungod ba kay takus kita, tungod ba nga aduna kita’y gibuhath aron mapasaylo ang atong mga sala? Kondili tungod sa Iyang unsa man?

. . . *grasya*;

¹¹⁰ Oh, grabe! Wala gayud ako’y madala, Ginoo. Walay unsa man nga mahimo ko, wala gyu’y usa ka butang nga mahimo ko. Pero ania! Iya akong gipili-nang-daan, gitawag Niya ako, gipili Niya ako. Dili ako ang nagpili Kaniya. Siya ang nagpili kanako, Siya ang nagpili kaninyo, Siya ang nagpili kanatong tanan. Dili kita ang nagpili Kaniya. Ang ingon ni Jesus, “Dili kamo ang nagpili Kanako, kondili Ako ang nagpili kaninyo.” Siya miingon, “Walay tawong makahimo sa pag-ari Kanako gawas kon pagadanihon siya una sa Akong Amahan, ug ang tanan nga gikahatag Kanako sa Amahan magaari Kanako. Ug wala kanila’y malaglag, gawas sa tawo nga pagalaglagon, aron matuman ang—ang Kasulatan.” Nakita n’yo? Ingon pa, “Apan ang tanan nga gikahatag Kanako sa Amahan magaari Kanako.”

¹¹¹ Oh, nagabhian na kaayo ko, dili ba? Ug wala pa ko nakahawa niini. Gani wala pa pud ko makasugod gyud mahitungod niini. Mao nga dalion ko na, tungod kinahanglan kong makadangat sa usa ka punto sa karon mismo, ug dalion na nato. Kinahanglan pa sàb nakong balikan ang bahin niining pagsagop pagkataudtaud. Oh, mapasensyahan pa ba ko ninyo sa—sa makadiyut lang? Hisgotan sà nato kini dinhi, ang pipila sa niining mga kaigsoonan gikan pa baya sa Georgia nga mianhi para lang karong gabhiona, panalanginan ang ilang kasingkasing. Karon, igsoong taga-Georgia, ug Texas ug kung taga asa man kamo, paminawa n'yo kining ika-5 nga bersekulo. Magpabilin sà tà mahitungod niini sa makadiyut.

Kita iyang gipili-nang-daan ngadto sa—ngadto sa . . .

¹¹² Unsa ma'y buut ipasabot sa pulong nga “ngadto sa”, ang pulong nga “ngadto sa”? Ang buut ipasabot niini nga adunay atong padulngan, ngadto sa. “Moadto ako ngadto sa lingkoranan.” Humes, nasabtan mo ba kana? “Moadto ako ngadto sa lamesa.”

Bueno, Iya kitang gipili-nang-daan ngadto sa pagkahimong mga anak nga sinagop pinaagi kang Jesus Cristo ngadto sa iyang kaugalingon, sumala sa Kaugalingon Niyang maayo nga katuyoan sa iyang kabubut-on,

¹¹³ Unsa man ka daku nga katuyoan? Kang kinsa man kadto nga katuyoan, kang kinsa man nga pagkamaayo? Iyaha Mismo. Iya Mismong maayo nga katuyoan sa Kaugalingon Niyang kabubut-on.

¹¹⁴ Bueno, unsa ba ang “pagsagop”? Karon tugoti kong iklaro kini karon, wala ko kabalo kon . . . wala na ko'y oras para mahuman kini, pero lakbitan ko lang gihapon kini. Dayon kung aduna ma'y pangutana, mahimo ko ninyong pangutan-on pagkataudtaud mahitungod sa mensahe, o unsa man. Paminaw. Ang pagsagop kaninyo dili nagapahinungod sa inyong pagkahimugso. Kondili ang pagsagop kaninyo mao ang pagpahimutang kaninyo. Sa dihang natawo kamo pag-usab, Juan 1:17, sa hunahuna ko, sa dihang natawo kita sa Espiritu sa Dios, nan mga anak na kita sa Dios. Tungod gipili na man kitang daan. Karon ania ang ginapaningkamotan kong maipasabot kaninyo, alang niining mga anak sa kaulahiang panahon, nakita n'yo, ngadto sa . . . Kita n'yo? Kita'y gipili-nang-daan sa (ngadto sa) pagkasinagop.

¹¹⁵ Karon, karon ania na kita. Bueno, mao kini ang medyo makapasakit sa mga Pentecostal. Ginaingon nila, “Natawo na ako pag-usab! Dalaygon ang Ginoo, naangkon ko na ang Espiritu Santo!” Maayo. Anak man kamo sa Dios. Husto kana. Apan bisan pa man dili kana mao'y akong ginahisgotan. Kita

n'yo, kamo'y gipili-nang-daan ngadto sa pagkasinagop. Ang pagsagop, kini mao ang pagpahimutang sa usa ka anak.

¹¹⁶ Duol diay kaayo ko dinha, giingnan man gud ko ni Becky nga nagkaduol kono ko dinha, mao diay nga dili ninyo madungog dinha sa luyo. Ako'y. . .

¹¹⁷ Kita n'yo, ang usa ka bata. Pila man ang nasayod sa mga kalagdaan mahitungod sa pagsagop sa Daang Tugon kaniadto? Siyempre, gitan-aw na ninyo. Pag matawo ang usa ka anak. Nagtoo ko nga nahisgotan ko na kana sa usa ka wali. Unsa gani kadto, Gene, mahinumduman mo ba? Nai-teyp na man kana. Oh, unsa gani kadto? Ako—ako—ako—basta ako nang nahisgotan kana. Oh, oo, nahinumdum na ko, *Patalinghugi Ninyo Siya*. *Patalinghugi Ninyo Siya*; bahin sa pagsagop og mga anak.

¹¹⁸ Bueno, sa Daang Tugon, pag ang usa ka—pag matawo ang usa ka bata diha sa usa ka pamilya, usa siya ka anak sa dihang mahimugso siya, tungod kay natawo man siya sa iyang mga ginikanan, usa siya ka anak sa pamilya ug manununod sa tanang mga butang. Karon, apan kini nga anak gipadaku kini sa mga tigtudlo. Mga Taga-Galacia, sa ika-5 nga kapitulo, sa ika-17 hangtud sa ika-25 nga bersekulo. Bueno. Gipadaku siya sa mga tigtudlo, mga tig-atiman, og mga magtutudlo. Karon, pananglitan, kung aduna ko'y anak nga nahimugso, ingnon tâng, usa ako ka amahan ug. . .

¹¹⁹ Ug mao kana'y hinungdan nga diha sa King James, pila man ang nakahunahuna nga talagsaon kaayo kung basahon mo ang King James Version, nga ang ingon, “Sa Balay sa Akong Amahan adunay daghang puloy-anan”? Usa ka balay, nga daghan og puloy-anan. Kita n'yo? Sa tinuod lang, kaniadtong—kaniadtong mga adlaw nga gihubad ang Biblia para kang King James, ang usa ka *balay* usa man gud ka “ginsakupan.” “Sa *ginsakupan* sa Akong Amahan adunay daghang puloy-anan.” Dili sa usa ka balay, og mga puloy-anan, kondili gitawag Siya nga Amahan sa niini nga ginsakupan. Ila man gud kining gihubad nga Biblikanhon kaayo, mao nga ingon niana kini diha sa Biblia.

¹²⁰ Pag ang usa ka amahan adunay halapad kaayo nga usa ka libo ka ektaryang umahan, o mora'g ingon niana, nan siguradong aduna siya'y daghang mga sakop nga nagapuyo *dinhi*. Aduna siya'y sinuholan nga mga trabahante nga nagapuyo *dinhi* aron mao'y mag-atiman sa mga karnero, aduna pud siya'y pipila ka trabahante *dinhi* dapit para mao'y mag-atiman sa mga baka, aduna pud siya'y pipila ka trabahante *dinhi* nga nagaadto didto sa hataas nga bahin sa sibsibanan nga usa ka gatus ka milya ang kalay-on, ug aduna siya'y pipila ka trabahante *dinhi* mismo nga mao'y nagaatiman sa mga kanding, ug aduna sàb siya'y pipila ka trabahante nga mao'y nagaatiman sa mga mula ug—ug sa nagkalainlaing mga butang. Siya—siya aduna gayu'y halapad nga gingharian. Ug nagasakay siya sa iyang gamay'ng asno ug

ginalibot niya ang matag usa ug ginasusi kung kumusta kaha sila, ang pagpang-alut sa mga karnero ug tanan nang ingon niana. Wala siya'y oras. . .

¹²¹ Dili diay ko ninyo madungog pag mopalayo ako gikan dinha. Ako—ako—sige paningkamotan kong magpabilin ra dinhi. Inyo na ba akong madungog og maayo karon, dinhi? Matikdi.

¹²² Nagasakay siya, ug nagalibot-libot, gapaningkamot sa—sa pagdumala sa iyang—iyang—iyang gingharian. Busa karon gusto niya. . . Ang maong anak ang mamahimong manununod sa tanan-tanan nga aduna ang maong amahan. Usa siya ka manununod.

¹²³ Ug pag natawo kita diha sa Gingharian sa Dios, pinaagi ni Jesus Cristo, nan manununod sàb kita sa Langit, isigkamanununod uban ni Jesus, tungod kay Siya man ang mipuli kanato. Siya'y nahimong kita (sala), aron nga kita mahimong Siya (pagkamatarung). Kita n'yo? Siya'y nahimong ako aron nga ako mahimong Siya, kita n'yo, isigkamanununod uban Kaniya. Bueno, karon hinumdumi n'yo kana, ang matag usa kaninyo.

¹²⁴ Karon, timan-i n'yo, Iya kamong gipili-nang-daan, pinaagi sa pagkahibalo-nang-daan, nga mopaingon gyud kamo Niini. Ang tanan nga nakasabot niini, ipataas n'yo ang inyong kamot, kita n'yo. Ang Dios, pinaagi sa pagkahibalo-nang-daan, gipili na kamong daan nga makaadto gayud sa Yutang saad. Unsa ba ang Yutang saad para sa Cristohanon sa karong panahon? Ipataas lang ang inyong kamot kung nasayod kamo. “Ang saad alang kaninyo ug sa inyong mga anak, og sa tanang atua sa halayo. Ug mahitabo sa kaulahiang mga adlaw, ingon sa Dios, nga igabubo Ko ang Akong Espiritu ngadto sa tanang unod, sa inyong mga anak nga lalaki ug inyong mga anak nga babaye.” Ug sa Isaias 28:18, “Kini mao ang sugo ibabaw sa sugo, lagda ibabaw sa lagda; dinhi madiyutay, og didto madiyutay. Kupti ninyo kung unsa ang maayo. Kay sa nagabungabunga nga mga ngabil ug laing mga dila Ako mosulti niining katawohan. Ug kini mao ang Kapahulayan, ang—ang Kapahulayan, ang yutang sabbath nga Akong giingon nga ilang pagasudlan. Ug, sa tanan niini, ayaw nilang mamati, kondili gilingo-lingo nila ang ilang mga ulo ug milakaw palayo, ug ayaw nga mamati Niini.” Kita n'yo? Tukma gayud.

¹²⁵ Unsa man kadto? Sama ra gayud niadtong mga tawo nga gikan pa sa Canaan, o gikan sa Egipto, hangtud ngadto sa kamingawan, ug nakadangat na sa duol, haduol na gayud unta aron nga makatilaw sa mga ubas nga gikan sa maong yuta. Igsoon, dinha, gusto niadto nga mga tawo nga bakwion ko, kadtong mahitungod sa Mga Hebreohanon 6. Unsaon man nako pagbakwi niana? Silang mga hangtud utlanan lang nga

magtotoo, dili gayud sila molabang! Dili gyud sila makalabang. Miingon si Jesus, “Ang among . . .”

Miingon sila, “Ang among mga ginikanan nanagpangaon man og manna didto sa kamingawan.”

¹²⁶ Ug miingon si Jesus, “Sila, ang matag usa kanila, nangamatay.” Kana mao ang pagkahimulag. Sila, ang matag usa kanila, nangamatay. Tinuod kana. Miingon, “Apan Ako mao ang Tinapay sa Kinabuhi nga nagagikan sa Dios sa Langit. Ang tawo nga mokaon niini nga Tinapay, siya dili gayud mamatay. Tinuod kana. Oo, sir, aduna siya’y Kinabuhing Walay Katapusan kung mokaon siya Niini, Ako mao kadtong Kahoy sa Kinabuhi nga atua sa tanaman sa Eden kaniadto.”

¹²⁷ Karon, kita n’yo, haduol na unta kaayo kini nga mga tawo! Kita n’yo, kung inyong himatikdan diha sa Mga Hebreohanon 6, dili sa ta mobalik dinha, apan sa Mga Hebreohanon 6, “Kini nga mga tawo nga sa makausa nakaambit na, haduol na unta kaayo, ug nakatitaw na sa Langitnong gasa.” Ngani mitambong na sila, nasaksihan na nila ang mga pagpang-ayo nga napamuhat, nasaksihan na nila ang mga tawo nga anaa sa gahum sa Dios, nakita na nila ang mga kinabuhi nga nausab, apan ayaw gihapon nilang manghawid Niini. Dili, sir. Dili gyud, sir. “Ug nakatitaw na sa gahum sa umalabot nga panahon; ug kung paningkamotan nilang bag-ohon pag-usab ang ilang mga kaugalingon ngadto sa paghinulsol, ingon nga ilang—nga ilang gilansang pag-usab ngadto sa ilang kaugalingon ang Anak sa Dios, ug giisip ang Dugo sa pakigsaad nga nagbalaan kanila . . .”

¹²⁸ “Miyembro man ko sa usa ka iglesia nga nagatoo sa pagpabalaan.” Maayo man kana kutob sa imong maabot, apan wala man gud ka nagapadayon ngadto pa sa unahan. Kita n’yo? Oo, sir. Gibalaan man sila sa kamingawan kaniadto. Oo, tinuod gayud. Atua kanila ang—atua kanila ang bitin nga tumbaga ug ang—ang tumbagang halaran, ug tanan na didto, para sa pagpabalaan, apan mosulod man sila ngadto sa Palestina alang sa kapahulayan. Wala na . . .

¹²⁹ Tan-awa n’yo diha sa Mga Hebreohanon 4, dili ba miingon si Pablo og “usa pa ka Kapahulayan”? Gibuhat sa Dios kaniadto ang ikapitong adlaw ug gihatagan sila og kapahulayan sa ikapitong adlaw. Sa usa na usab ka bahin naghigot siya og usa ka adlaw sa kapahulayan, “ug sa karon kang David.” Dayon gihatagan Niya sila og usa pa ka Kapahulayan, “Umari Kanako kamong tanan nga gikapoyan ug nabug-atan, hatagan Ko kamo og Kapahulayan.” Sumulod kamo sa niini nga Kapahulayan! Kay kita nga nakasulod na sa niini nga Kapahulayan miundang na sa atong mga pagpamuhat maingon man usab nga miundang ang Dios sa Iyang pagpamuhat kaniadto sa adlaw’ng igpapahulay. Mao gayud. Mao kana ang

inyong Kapahulayang Sabbath. Kana ang inyong tinuod nga Kapahulayan sa niini nga Yutang saad.

¹³⁰ Ang Espiritu Santo usa man unta ka saad para sa mga tawo. Pero nganong gusto man nila og edukadong manggialamon nga mga magwawali nga pasagdan ra silang magsul-ob og purol ug putlan ang ilang buhok, ug mang-lipstick, ug ang mga lalaki nagasugal ug nagainom og beer ug nagasulti og mga pagpakatawa, ug nanagpatuyang ug kung unsa na lang ang ginabuhat nga sama niana, ug nagapatawag pa sa ilang kaugalingon nga mga miyembro sa iglesia? Aba, dawaton hinoon nila ang mga ingon niana ug isalikway ang pagpanguna sa Espiritu Santo! Aba, ang ingon sa Biblia ang Pulong sa Dios labi pang mahait kay sa espada nga duhay-sulab nga nagadulot sa bukog, ug nagatugkad usab sa mga hunahuna sa kasingkasing. Oo, bisan sa mga hunahuna sa panghunahuna!

¹³¹ Ug kung nahigugma kita sa kalibutan o sa mga butang nga iya sa kalibutan, ang gugma sa Dios wala gyud kanato. “Daghan ang mga gipanawag, pero diriyut ra ang mga napili; kay masigpit ang pultahan ug hiktin ang dalan nga nagahatud ngadto sa Kinabuhi, ug mamahimong diyutay ra ang makatultol niini. Daghan ang magaduol Kanako nianang adlaw ug molingkod sa Gingharian,” miingon si Jesus, “kauban ni Abraham, ni Isaac ug ni Jacob. Apan ang mga anak sa gingharian pagaabugon, ug moingon, ‘Ginoo, dili ba gibuhat man namo *kini* sa Imong Ngalan? Dili ba nanagwali man kami? Dili ba nahimo man kaming si Doktor *Ingon niani-ug-ingon niana* ug si Reverend *Ingon niani-ug-ingon niana*?’ ‘Wala Ko gayud kamo igkaila. Pahawa kamo Kanako, kamong mga mamumuhat og dautan, wala Ko kamo igkaila.’ Dili ang tanan nga nagaingon, ‘Ginoo,’ ang makasulod. Kondili mao lamang ang nagabuhat sa Kabubut-on sa Akong Amahan nga anaa sa Langit, mao kana ang makasulod.”

¹³² Mao kana, ang pagsulod sa niining Yutang saad. Unsaon man nato pagsulod niini? Kita’y gipili-nang-daan ngadto niini. Ang Iglesia, pinaagi sa pagkahibalo-nang-daan sa Dios, gipili-nang-daan (alang sa unsa?) alang sa Iyang kadunggan, pinaagi sa Iyang grasya, alang usab sa kahimayaan, ug pagsimba ug paghimaya sa Dios. Si Papa, nga atua na kaniadto sa sinugdan pa lang, ingon nga nagalungtad-sa-kinaugalingon, og walay unsa man sa Iyang palibot, nangandoy nga adunay magasimba Kaniya, busa Siya nagtagana-nang-daan ug nagpili-nang-daan og usa ka Iglesia, sa wala pa ang pagkatukod sa kalibutan, ug gisulat ang ilang mga ngalan diha sa Basahon sa Kinabuhi nga iya sa Cordero, sa dihang sila . . . nga gipatay na sa wala pa ang pagkatukod sa kalibutan, aron nga madayag sila alang sa Iyang kahimayaan ug alang sa mga pagdayeg Kaniya sa katapusang panahon, pag tigumon na ang tanang mga butang sa nianang usa ka Tawo, nga si Cristo Jesus. Whew! Himaya! Mao kana. Kana

gayu'y . . . Ug mao na kana mismo, igsoon kong lalaki, igsoong babaye. Ayaw gayud kamo'g irog gikan Niana.

¹³³ Ang Dios, pinaagi sa Iyang grasya sa pagpili, gitawag kamo. Ang Dios, pinaagi sa Iyang grasya sa pagpili, gibalaan pud kamo. Ang Dios, pinaagi sa Iyang grasya sa pagpili ug sa Iyang gahum, gibautismohan kamo ug gipahimutang kamo pasulod ngadto niining yuta nga Kapahulayan. Sila nga nakasulod sa niini nga Kapahulayan miundang na sa ilang pagkahisalaag. Miundang na sila sa ilang mga buhat sama usab kaniadtong miundang ang Dios sa Iyang pagpamuhat. Aduna sila'y dili-ikaasoy'ng kalipay, ug puno sa himaya! Ang Kahoy sa Kinabuhi nagapamulak diha kanila. Aduna sila'y pagkamapuanguron, kaaghop, pagkamaayo, pailub tungod sa pagtoo, pagtoo, pagkamalulot, kaaghop, ug uban pa. Nagapamulak diha kanila ang Kahoy sa Kinabuhi tungod kay nakaangkla man ang ilang paglaum diha kang Cristo Jesus, ang saksi sa Espiritu Santo nga nagapamatuod pinaagi'g mga ilhanan ug mga katingalahan nga naganunot sa mga magtotoo. "Kini nga mga ilhanan maganunot kanila nga nagatoo." Samtang nagapadayon sila, nagapang-ayo sila og mga may sakit, nanghingilin sila og mga yawa, nagasulti sila og laing mga pinulongan, makakita sàb sila og mga panan-awon. Sila . . . Ug nagalakaw sila kauban sa Dios, nagapakigsulti sila sa Dios. Wala gayu'y yawa nga makapairog kanila, malig-on man sila, og nagapaabot . . . ? . . . Ginakalimtan ang mga butang nga nangagi na, nagapadayon sila ngadto sa dauganan sa langitnong pagtawag diha kang Cristo Jesus. Ingon niana sila. Ingon niana gyud sila. Ingon niana kanang Iglesia.

¹³⁴ Giunsa man nila pagkadangat dinha? Dili ka puedeng moingon, "Bueno, Ginoo, kabalo Ka, usa niadto ka adlaw nga misugod ako sa pagpanigarilyo, ug nahisalaag ako, dayon nahunahuna ko nga ako'y . . ." Oh, dili, dili, dili, dili gayud.

¹³⁵ Tungod sa pagpili-nang-daan! Gitawag Niya kita, ug sa misunod na kita Kaniya mao kadtong higayon nga miingon tà, "Dios, kami'y mga nahisalaag ug nalaglag. Wala gani kami'y hunahuna nga luwason ang among kaugalingon. Ang among kinaiyahan kaniadto iya gayud sa usa ka baboy, mga baboy man kami sa sugod pa lang."

¹³⁶ Umadto ka sa tangkal sa baboy ug tan-awa ang usa ka anay, ug moingon, "Karon, tan-aw dinhi, tigulang anay, aduna ko'y gustong isulti kanimo. Sayup baya nga moinom ka og hinugasan."

¹³⁷ Moingon ra siya, "Oink-oink." Kita n'yo? Bueno, ingon niana ra usab ang aduna kaninyo sa pagluwas sa kaugalingon n'yo mismo. Eksakto gayud.

¹³⁸ Moingon ka, "Gining, dili man ka angay magsul-ob og ingon niana nga mga sinina, kinahanglan magsinina ka og tarung. Kinahanglan *ingon-ani* ang imong buhaton. Dili ka angay'ng

moadto sa . . . Dili ka angay'ng motambong niining mga party-party sa pagdula og baraha. Dili pud ka angay'ng manigarilyo. Dili mo gayud angay'ng buhaton ang *ingon-ani*. Mister, dili sàb ka angay'ng magsul-ob *niana*."

¹³⁹ Moingon ra siya, "Oink-oink. Miyembro man ko sa *Oink-oink*." Uh-huh. "Oink," mao lang gayud kana ang ilang nahibaloan. "Bueno, sultihan tà ka pareho ra man ko ka buutan nimo. Oink-oink!" Kita n'yo, ginasalikway nila ang pagpanguna sa Espiritu Santo, kay ang Biblia miingon man nga kung nahigugma kamo sa kalibutan o sa mga butang nga iya sa kalibutan, ang gugma sa Dios wala man lang diha kaninyo.

¹⁴⁰ Unsa ba ang nakapahimo kanila nga talagsaon? Usa kamo ka balaang nasud. Unsa ma'y inyong gibuhat? Migawas mo gikan niadto nga yuta. Mao nga anaa na kamo sa usa pa ka Yuta. Giunsa man ninyo pagdangat dinha? Mao kana ang Yutang saad. Unsa man nga matang sa saad? "Mahitabo sa kaulahiang mga adlaw, ang ingon sa Dios, igabubo Ko ang Akong Espiritu ngadto sa tanang unod." Pinaagi sa usa ka Espiritu kitang tanan gibautismohan pasulod ngadto niining usa ka Yutang saad. Amen. Mga igsoong lalaki ug mga igsoong babaye, alleluyah, nga may kaputli sa kasingkasing, walay pagpangabugho, walay panagkaaway, wala gyu'y unsa man! Dili ko igsapayan kung nahisalaag man ang usa ka igsoon, o bisan unsa pa'y iyang ginabuhat, adtoi gihapon ninyo siya.

¹⁴¹ Ngani duna ko'y giadtoan nga usa ka igsoon dili pa lang dugay, nga nahisalaag. Miingon kanako ang usa ka batan-on pa nga lalaki, miingon, "Pasagdi na kanang salbahisa. Pasagdi na siya."

¹⁴² Ingon ko, "Kung moabot man ko sa punto nga wala na ko'y kahingawa para sa akong igsoon, nan panahon na para kanako nga moadto sa altar, tungod kay nahulog na ko gikan sa grasya." Ingon pa ko, "Moadto gyud ako samtang aduna pa siya'y gininhawa sa iyang lawas, ug duawon ko gayud siya sa kon asa man." Oo, sir. Ug naduaw ko siya, alleluyah, og napahibalik siya. Oo, sir. Karon nahibalik na siya sa panon nga luwas. Oo, sir. Kay kung wala pa na siguradong nahisalaag na gayud unta siya.

¹⁴³ Kaganina sàb sa dihang nakita ko kadtong luoy'ng babaye nga anaa dinha, ug gitawag ko sa sheriff, ang ingon, "Aba, dapat gisul-oban na unta siya og straitjacket." Ingon pa, "Nagsalimuang na man gud siya, wala na gyud siya sa husto niyang pangisip." Siya—siya, gipahimutang ra nila sa hotel ang maong babaye. Pag-abot nila.

Ingon ko, "Okey lang kana."

¹⁴⁴ Miingon, ingon ang sheriff, "Aba, Billy!" Kaila ko man siya kaayo, ug kaila ko na siya sukad niadtong batan-on pa ako.

Ingon siya, “Basta kung adunay unsa mang butang nga mahimo ko para makatabang kanimo.”

Ingon ko, “Okey ra lagi.”

Miingon, “Matabangan mo ba ang maong babaye?”

Ingon ko, “Dili, apan mahimo man *Niya*.” Ingon ko, “Kadali lang.”

¹⁴⁵ Busa gipagawas nila ang maong babaye didto. Ug sa pagbiya niya kaganina, malinawon na siya. Unsa man kadto? Nagpadala kami og pag-ampo para kaniya. Amen! Siya’y naggrabe na . . .

¹⁴⁶ Ingon sila, “Gusto ba nimong magpatawag og doktor?” Giingnan ang iyang bana, “Gusto ba nimong magpatawag og doktor?”

¹⁴⁷ Mitubag pud, “Wala na ma’y mahimo ang doktor para kaniya.” Ug tinuod bitaw. Nabuang na man siya; mao nga wala na gyu’y unsa man nga mahimo ang doktor para kaniya.

Miingon pa, “Ang among paglaum na lang mao ang makaadto *didto*.”

Ug ingon sa sheriff, “Billy, wala gyud ko makasabot niana.”

Miingon ko, “Wala man ko galaum nga masabtan nimo,” kita n’yo, “wala ko galaum nga masabtan nimo.”

¹⁴⁸ Tungod, oh, grabe, wala man pud ko makasabot niadto! Wala gyud. Apan, igsoon, ang Dios sa Langit . . . sa napahilayo ako kaniadto, didto usa ka higayon, may usa ka Butang nga miduol kanako. Amen! Dili tungod kay gitinguha kong moduol, dili, kondili, may usa ka Butang gayud nga miduol kanako. Tungod kay sa wala pa ang pagkatukod sa kalibutan, gipili na mang daan sa Dios, alleluyah, nga mama-Iyaha kita, alang sa Iyang kadungganang ug kahimayaan. Paminaw mo! Kadtong Iyang mga giila-nang-daan, Iyang giunsa man? Gitawag. Husto ba? Gitawag ba Niya kamo? Oo! Nganong gitawag man Niya kamo? Tungod Iya kamong giila-nang-daan. Kadtong Iyang mga giila-nang-daan, Iyang gitawag; kadtong Iyang mga gitawag, Iyang gimatarung. Husto ba? Ug kadtong Iyang mga gimatarung, Iyang gihimaya! Amen! Mao kana ang giingon sa Biblia: “Kadtong Iyang mga giila-nang-daan, Iyang gitawag.” Sa matag henerasyon! Kadtong Iyang mga gitawag, Iya nang gihimaya. Para unsa? Basahon ko ùsa ang Kasulatan dinhi. Sige.

Sila iyang gipili-nang-daan ngadto sa pagkahimong mga anak nga sinagop pinaagi kang Jesus Cristo ngadto sa iyang kaugalingon, sumala sa Kaugalingon Niyang katuyoan . . .

Alang sa mga pagdayeg sa Iyang himaya . . .

¹⁴⁹ Oh, nasabtan n’yo ba kini? Alang sa mga pagdayeg sa Iyang himaya! Ingon nga maatua gihapon Siya didto sa Eternal nga

mga kapanahonan nga magaabot pa, ug managsinggit ang Iyang mga anak, “Abba, Amahan! Abba, Amahan!”

¹⁵⁰ Ug moingon ang mga Manulonda, “Unsa kaha’y ilang ginahisgotan? Unsa gyud kaha kanang ilang ginahisgotan?”

¹⁵¹ Maanindot kaayo kini nga nagahulagway bahin niadtong mawaldason nga anak. “Nawala ako.” “Mao kini ang akong anak. Siya nawala kaniadto ug karon siya hingkaplagan. Siya namatay kaniadto, ug nabuhi siya pag-usab. Dad-a n’yo dinhi ang nating baka nga gipatambok, ang pinakanindot nga kupo, og usa ka singsing ug isul-ob kana diha sa iyang tudlo. Ug kita’y...” Dili ikatingala nga kaniadto nagakadungan pag-awit ang mga bitoon sa kabuntagon, ang mga anak sa Dios nagkaduyog sa pagsinggit sa kalipay, sa dihang ilang nakita ang plano sa kaluwasan, nga gisulat sa Dios ang inyong ngalan diha sa Basahon sa wala pa ang pagkatukod sa kalibutan.

¹⁵² Karon moingon mo, “Ingon niana man ang gitooan ni Calvin.” Wala gyud ko nagatoo kang Calvin. Usa man ka mamumuno si Calvin. Ngani dunay usa ka tawo nga gipatay ni Calvin tungod lang kay nagbautismo ang maong tawo sa Ngalan ni Jesus. Usa siya ka salbahis, nga kinahanglan gayud nga mabag-o, siya mismo. Oo, sir. Hinoon ang iyang gisulti, ang gisulti niya mahitungod sa pipila ka butang, husto man. Walay...apan ang iyang...Ang gibuhay niya, ang usa ka tawo nga mopatay og tawo tungod lang sa ingon niadto, mangil-ad kaayo kadto, makasasala gayud. Oo.

Nga iya nga gipadagaya nganhi kanato...

¹⁵³ Oh, kadali lang, wala pa gyud nako naipasabot ang kanang “pagsagop,” naipasabot ko na ba? Nagabhian na ba kaayo ko? Atong tan-awon ang ginaingon niining orasan dinhi, kung unsa na ba’y oras. Okey. Basta—basta mogahin na lang ta og diyes minutos alang niining mga tawo nga gikan pa gyud sa halayo. Ania na. Ania.

¹⁵⁴ “Pagsagop,” ihulagway ko kaninyo karon kung nganong ginabuhay man kini. May usa ka amahan nga dunay dakung gingharian, og nagalibot-libot siya dinha. Karon dunay usa ka anak nga lalaki nga natawo kaniya. Oh, nalipay kaayo siya! (Ingon niana ang Dios.) Busa kabalo ba mo kung unsay buhaton sa maong amahan? Mangita siya og pinakamaayo nga tig-atiman, og tigtudlo. Kabalo na man mo kung unsa ang usa ka tigtudlo, dili ba? Usa kini ka magtutudlo. Mangita siya og pinakamaayo nga magtutudlo nga mapangita niya sa tibuok nasud. (Ug makapanguli na dayon ta karon, mao nga paminaw mo.) Ug mangita siya og pinakamaayo nga magtutudlo nga mapangita niya. Dili siya basta na lang mokuha og usa ka badlongon, tungod gusto gud niya nga mamahimong usa ka tinuod nga lalaki ang iyang anak.

¹⁵⁵ Dili ba gusto sàb ninyo nga ingon niana ang inyong mga anak? Sigurado gayud, ang pinakamaayo nga maihatag n'yo kanila! Oo, sir. Busa kung gahunahuna og ingon-ana ang usa ka natural nga tawo, unsa pa kaha sa hunahuna n'yo ang ginahunahuna sa Dios para sa Iyang mga anak? Ang pinakamaayo sàb gayud nga makuha Niya.

¹⁵⁶ Busa, gusto sa maong amahan og usa ka tawo nga matinuuron. Bueno, ayaw niya og tawo. . . tawo nga moingon, “Karon, tan-awa, ako—ako. . . Junior, buhata lang ang unsa man nga gusto mong buhaton, iho.” “Oh, oo, amahan, uh-huh, maayo man siya, usa siya ka buutan nga batang lalaki.” Medyo pikpik-pikpikon ang bata diha sa likod ug para ingnon nga aduna siya'y dakung nahimo. Dili, dili ingon-ana. Kanang tawhana siguradong mapotbol gyud sa trabaho sa gilayon. Oo. Ang gikinahanglan sa amahan usa man ka tawo nga matinud-anon. Kung nagbinuutan ang batang lalaki, isulti kaniya. Kung wala nagbinuutan, nan isulti gihapon kaniya kung unsay problema.

¹⁵⁷ Ug kung naghunahuna og ingon-ana ang usa ka yutan-ong amahan. . . Dili ba diay ninyo gusto nga magmatinuuron kaninyo ang usa ka tawo, nga magmatinuuron ang magtutudlo bahin sa inyong mga anak? Gusto gyud. Bueno, unsa man sa hunahuna n'yo ang ginahunahuna sa Dios? Ug Siya ra ang nahibalo; wala kita mahibalo, kondili Siya lang. May-kinutoban kita, dili nato masulti. Apan Siya'y walay-kinutoban ug nasayod mismo.

¹⁵⁸ Busa, kabalo ba mo kung unsay gibuhay sa Amahan? Wala Siya miingon, “Mokuha Ako og usa ka santo papa aron mao'y magbantay sa Akong mga anak.” Wala usab Siya miingon, “Mokuha Ako og usa ka—usa ka obispo.” Wala, wala gayud. Wala Niya kana buhata, tungod kay nasayod man Siya nga masayup ang papa, ingon man usab ang obispo. Kita n'yo? Wala pud Siya sukad-sukad miingon, “Mokuha Ako og usa ka pangkadaghanang tigdumala aron mao'y magbantay sa Akong mga iglesia.” Wala, wala gayud.

¹⁵⁹ Kondili ang Espiritu Santo ang Iyang gikuha. Kana mao ang Iyang Tigtudlo, uh-huh, nga mao'y moatiman sa Iyang mga anak. Oo. Kung ingon niana unsaon man ninyo pagkahibalo nga nakahibalo gyud ang Espiritu Santo? Nagapakigsulti Siya pinaagi sa mga ngabil sa tawo. Unsaon man ninyo pagkahibalo kung Kamatuoran ba ang Iyang ginasulti? Pagmakita ninyo ang Balaang Espiritu nga nagapakigsulti pinaagi sa mga ngabil nga nagasulti gyud sa Kamatuoran sa tanang panahon, nga nagapanagna ug nagakatuman gayud sa ingon ka hingpit, sama sa gisulti ni Samuel, kung ingon niana mahibaloan ninyo nga Kamatuoran kana. Mahitabo man nga tukma. Tungod kay ang Dios miingon, “Kung magasulti siya ug kung unsa ma'y iyang ginasulti wala nagakatuman, nan ayaw n'yo siya patanglihugi, tungod kay Ako wala nagauban kaniya. Apan kung ang iyang ginasulti nagakahitabo mismo, bueno, kung

ingon-ana patalinghugi n'yo siya, tungod kay Ako nagauban kaniya." Kita n'yo? Mao kana. Ingon niana ang Iyang ginabuhat.

¹⁶⁰ Karon, dayon moduaw Siya. Bueno, unsa kaha sa hunahuna n'yo ang isulti sa Tigtudlo kung kinahanglan na Niyang moadto sa Amahan? Ug moingon, "Ang Imong—Imong mga anak nagapanglihok man nga mangil-ad. Sultihan Ko Ikaw, kadtong Imong anak nga lalaki, siya, hum, usa siya ka tampalasan. Usa siya ka latagaw, wala pa gyud Ko nakakita sukad og ingon niadto nga lalaki! Grabe, kabalo ba Ka kung unsay iyang ginabuhat? Ug kadtong Imong anak nga babaye sàb! Oh, whew, wala Ko kabalo kung unsay Imong buhatan kaniya. Hmm. Bueno, kabalo ba Ka kung unsa? Siya mora gyud siya og. . . Nakameyk-ap siya og ayo nga sama sa ubang mga babaye didto. Nga Filistihanon. Oo, Sir, gusto niyang manglihok nga sama kanila."

"Ang anak Kong babaye?"

¹⁶¹ "Oo, ang anak Mong babaye." Ingon niana usab ang igasulti sa Balaang Espiritu mahitungod sa iglesia karong panahona. Dili gani ikatingala nga dili na kita mahimong magkaaduna pa og rebaybal. Kita n'yo? Bueno, tinuod kana.

"Unsa man sàb ang anak Mong lalaki? Huh? Mao gihapon."

"Unsa?"

¹⁶² "Bueno, abi Nimo kanunay Mong ginaingon nga ang mga karnero kinahanglan magakaon didto niadtong sibsibanan nga atua ang Pagkaong pang-karnero. Oo, kabalo ba Ka kung unsay iyang gibuhat? Gidala niya sila didto niadtong nagkatipun-og nga sagbot. Igo lang silang gidala didto ug gipahimutang silang tanan didto sa sapa, ug gipasagdan ra sila nga manag-alirong niadtong nagkatipun-og nga sagbot, nga nagakaon niadtong mga willow, ug niwang na kaayo sila tungod halos dili na man sila makahawa didto." Ingon niana ang mga obispo, mga pastor nga ginapanghimakak ang Gahum niini. "Bueno, sultihan Tà Ka sa tinuod, wala pa gyud Ko nakakita sukad og ingon niadto nga panon sa mga karnero nga gipangnerbiyos sa tibuok Kong kinabuhi." Dili Niya gusto ang ingon-niana. Dili. "Ug kabalo ba Ka kung unsa? Kining mga baka dinhi, abi Nimo nagsulti na baya Ka—Ka nga pakan-on sila nianang—nianang tanum nga alfalfa dinha, kabalo na Ka, aron manambok sila?"

"Bitaw."

"Pero kabalo ba Ka kung unsay iyang ginapakaon kanila?"

"Wala."

¹⁶³ "Kanang mga ironweed. Oo. Ginapamiyembro pud niya sila sa mga kapunongan ug tanan na. Wala Ka pa nakakita og ingon-ana sa Imong kinabuhi. Wala Ka pa sukad-sukad nakakita og ingon-niana sa tibuok Mong kinabuhi. Kabalo ba Ka kung unsay iyang ginabuhat? Nagakuyog-kuyog siya didto

nga nagapanigarilyo og dakung tabako, nga pinahangad-hangad pa. Kauban niya ang iyang asawa, nagasul-ob kini og purol nga sama ra sa ginabuhat niadtong mga Filistihanon. Oo.” Ingon niana gihapon nga matang sa mensahe ang igapahayag sa Balaang Espiritu mahitungod sa iglesia sa karong panahon. Karon, unsa ma’y hunahuna n’yo mahitungod niana?

¹⁶⁴ Ingon-ana ang pagsagop. Unsa ma’y Iyang . . . Iyang gibuhat? Iya kitang—kitang gipili-nang-daan ngadto sa pagkasinagop. Gihatag Niya kanato ang Espiritu Santo; apan, kadali lang, ang pagsagop, mao kana’y atong ginahisgotan. Ang pagsagop!

¹⁶⁵ “Bueno, kabalo ba Ka sa iyang gibuhat? Dunay miagi nga obispo niadtong miaging adlaw, ug dunay gisulti. Nagpahigayon siya niadto og diyutay’ng panerbisyo sa pagpang-ayo didtong dapita, ug miagi ang obispo. May usa ka lalaki, usa ka igsooong lalaki, ang miabot ug nag-ampo para sa mga may sakit. Ug miingon ang maong obispo, ‘Thunong mo kana!’

“Oh, oh, oo, padreng obispo, ihunong ko na kini.’

“Ayaw na mo pagpakigtimbayayong.’

“Oh, dili, dili, padreng obispo, dili na gayud.’

¹⁶⁶ “Ug ania Ako ug gisulti kaniya ang Kamatuoran gikan mismo sa Imong Pulong. Kita Mo, ania Kini. Gibasa Ko ngadto kaniya ang Imong mga kasugoan sa kung unsa ang tukmang pagabuhaton, pero ayaw man niyang maminaw niini. Ingon niya, ‘Oh, alang lang kana sa laing kapanahonan, para ra man kana sa laing anak sa laing panahon. Dili ako ang ginapahinungdan niana.’” Mao kana. Kana, bueno Kamatuoran kana, higala. Karon dili ba ninyo makita kon asa nasayloan sa iglesia ang puwesto niini, kon nganong wala na kita nagkaaduna og rebaybal, kon nganong wala na kita nagkaaduna og mga butang nga nagakahitabo? Tungod niana.

¹⁶⁷ Miingon si Josue, “Gad, buut ko nga ikaw . . . dinhi mismo ang imong puwesto sumala sa giplano na, dinhi ang imong puwesto, dinhi mismo. Umanhi ka dinhi, Gad, ug magpabilin ka dinhi. Benjamin, umanhi ka dinhi mismo dapit. Ug karon pahilayo kamong tanan dinha sa utlanan sa mga Filistihanon.” Pero pagbalik ni Josue, atua na silang tanan didto sa mga Filistihanon, nagapahigayon og dakung kumbira, nanagsayaw na nga ingon niana, ug nakameyk-ap na ang tanang mga kababayan-an, ug nagasayaw-sayaw ug nagkasadya gayud. Ug gikalot ni Josue ang iyang ulo, ug miingon, “Karon naunsa na man?” Eksaktong ingon niana gayud ang nagakahitabo karon; hinoon dili man tanan, salamat sa Dios, dili man tanan, apan daghan na kaayo. Oo.

¹⁶⁸ Bueno unsa ma’y nahitabo kaniadto? Mao kadto ang nahitabo. Dili ba ninyo mahanduraw kana Siya, ang Balaang Espiritu, nga mamula atubangan sa Amahan sa diha nga kinahanglan Niyang isulti ang ingon-ana? Oh, kaulaw gayud!

“Ako—Ako—gisultihan Ko man siya, apan siya—siya—ayaw man niyang maminaw Niini. Gisulti Ko na kana kaniya, ug gipabasa pa gani kaniya dinha mismo sa Basahon. Ngani aduna Ko’y—aduna Ko’y gipaadto nga usa ka kabus nga ministro ug gipapakita kaniya nga si Jesus Cristo mao sa gihapon kagahapon, karon, ug hangtud sa kahangturan. Ug kabalo ba Ka kung unsa? Gipaadto hinoon niya didto ang usa niadtong—ang usa niadtong mga tigulang nga tigbantay og mga kanding ug para sultihan ang maong ministro nga alang ra kono kadto sa laing kapanahonan. Kita Mo? Ug baho kaayo siya pag-abot niya didto, nga nanimahong kanding, kabalo na Ka, tungod pud sa mga sigarilyo, ug kabalo na man Ka, ug uban pa, baho gyud kaayo pag-abot niya didto. Kita Mo? Apan sultihan Tà Ka, kadtoong tigbantay og mga kanding aduna siya’y daghang medalya nga nakataud kaniya, kay, sultihan Tà Ka, kung Imo laging isulat ang iyang ngalan diha sa mantalaan, nan mogahin gyud (diha sa iyang obituary) mogahin gyud og katunga sa panid para lang maisulat ang iyang mga titulo. Oo, Sir, mao nga ganahan gyud sila kaniya didto sa maong probinsya, pero, sultihan Tà Ka, wala gyud siya’y hibangkaagan kung unsaon pagpakaon sa mga karnero. Mao kana ang problema. Ayaw gayud niyang maminaw Kanako,” ang ingon sa Balaang Espiritu. “Ngani gisultihan Ko na siya nga Ikaw mao sa gihapon kagahapon, karon, ug hangtud sa kahangturan, apan siya—ayaw gayud niyang motoo niini. Siya na ang pinaka-talawan nga Akong nakita sukad-sukad sa tibuok Kong kinabuhi. Oo. Ug gihimo pa gyud siya sa iglesia nga usa ka tigdumala, usa ka obispo, o unsa pa man, og nagapaminaw kaniya ang tanang mga tawo. Ug usab kabalo ba Ka kung unsa? Nagagamit sila niadtong. . . aduna sila og gamay’ng butang didto nga ginatawag nilang ‘telebisyon.’ Pag paandaron na gani kadtoong gamay’ng butang nga nakaingon *niana*, ug—ug makita na dayon kadtoong mga kababayan-an nga bisan unsa na lang ang ginapangbuhay, nga nanagsul-ob og tanan nang matang sa mugbo nga mga sinina. Ug, abi Nimo, kadaghanan baya sa Imong mga anak nga babaye naka- . . .”

“Oh, dili unta kana tinuod!” Kita n’yo?

¹⁶⁹ Moingon, “Oo, ingon-ana bitaw sila. Oo ginabuhay nila kana. Hum. Ang uban kanila nagatuaw man alang sa rebaybal, Amahan, ang uban kanila nagatinguha gyud niana. Ngani ang uban kanila nagalakaw gayud diha sa linya, ang uban pud kanila nagabarug gayud sa Pulong sa ingon ka matitud-anon. Pero ang uban, wala na Ko kabalo sa kung unsay buhaton, sila’y—sila’y napahilayo na gyud didto. Kabalo ba Ka kung unsay ginabuhay sa uban? Ilang ginabiaybiayan sila, nagaingon, ‘Sila’y usa lamang ka pundok sa mga buang-buang.’”

“Aba, nagapabati gyud kana og pagkahiubos Kanako.”

¹⁷⁰ Apan usabon na pud nato karon ang hulagway. Karon

ang Amahan, ang Iyang anak usa ka buutang lalaki. Ang iyang Amahan gyud mismo—mismo ang kauban, ania gihapon ang usa ka Tigtudlo, ang Balaang Espiritu. Sa kung asa man nga direksyon paingon ang Balaang Espiritu, moingon Siya, “Molakaw Ako,” ang ingon sa Tigtudlo, “Ako’y . . .”

¹⁷¹ Moingon ang anak, “Mokuyog ako Kanimmo sa paglakaw. Mouban ako Kanimmo.”

“Oh, habog man kaayo ang bungtod, anak.”

¹⁷² “Mouban gihapon ko Kanimmo. Aduna man ko’y pagsalig Kanimmo. Kung hinay-hinay na akong kapoyon, ipataas man Niya ang akong kamot ug gunitan ako para makapadayon.”

“Apan aduna ma’y mga leon didto sa bungtod!”

¹⁷³ “Dili kana igsapayan basta anaa lang Ka, wala gyud kana’y bisan gamay’ng diperensya. Nagalakaw bitaw ko mismo uban Kanimmo.”

“Pero peligro baya didto, danlog man gud ang mga bato.”

¹⁷⁴ “Dili ko igsapayan, basta ginagunitan Mo lang ang akong kamot, mokuyog ako Kanimmo sa paglakaw. Mokuyog gyud ako Kanimmo sa paglakaw.”

“Oh, kabalo ba ka kung unsa? Ginabuhat man kana sa imong Amahan kaniadto, kita mo. Maayo kana. Oo, sir.”

¹⁷⁵ Mitungas na kami didto ibabaw sa bungtod. “Oh,” ingon Niya, “kabalo ba Ka, Amahan? Ang Imong anak naliwat gayud sa iyang ginikanan. Siya’y bug-os, gayud nga sama Kanimmo. Sa matag Pulong nga Imong ginasulti, nagaingon gyud siya og ‘amen’ Niini. Ngani Ako—Akong gipaablihan kaniya ang Biblia niadtong miaging adlaw, ug ang ingon Niini, ‘Si Jesus Cristo mao sa gihapon kagahapon, karon, ug hangtud sa kahangturan.’ Kabalo ba Ka sa iyang giingon? Misinggit siya ug gibayaw ang iyang mga kamot, ug miingon, ‘Alleluyah! Amen!’ Oh! Ug kabalo na Ka nga giingon Niini dinhi, sa—sa Imong Pulong, kabalo na Ka, kon diin miingon Ka, ‘Ang mga buhat, ang nagatoo Kanako, ang mga buhat nga Akong ginabuhat pagabuhaton usab niya?’”

¹⁷⁶ “Oo, nahinumdum bitaw Ko nga nagsulat Ko Niana ngadto sa Akong anak. Oo, nahinumdum Ko nga nagsulat Ko Niana.”

¹⁷⁷ “Oh, sa dihang nabasa niya kana, misinggit gayud siya ug milukso-lukso, misiyagit og, ‘Alleluyah, Ginoo. Tangtanga ang tanang pagka-kalibutanon gikan kanako. Himoa akong ingon Niana!’ Oo, Sir. Ug tanan na niadtong mga butang nga iyang nabuhat!”

¹⁷⁸ “Oh,” misulti niini ang Amahan, “Ako’y—nalipay Ako niana nga anak. Buutan gyud kana nga anak. Oo. Bantayi siya sulod sa pipila pa ka tuig, tan-awa kung unsaon niya—tan-awa kung unsaon niya sa pagpadayon, ug kung sa unsang paagi

siya magapadayon.” Wala magdugay milabay ang mga tuig. “Kumusta na man siya?”

179 “Oh, my, nagatubo gayud siya diha sa grasya! Oh, my! Siya gayu’y... Nagadilaab gayud siya. Sultihan Tà Ka, siya—siya sa tinuod lang... Aba, ginapangunahan niya ang mga karnero, og mahimo niya silang atimanon nga—nga sama gayud sa Imong pag-atiman. Dili niya sila hatagan og mga sagbot sa dagat. Dili pud niya sila hatagan og mga ironweed. Pag mag-alirong sila, nga moingon, ‘Gusto namong magpamiyembro sa iglesia,’ moingon siya, ‘Paghilum mo, dili man kana ang inyong gikinahanglan! Dili, sir. Ania ang inyong gikinahanglan,’ ‘Maghinulsol kamo ug magpabautismo, ang matag usa kaninyo, sa Ngalan ni Jesus Cristo, alang sa kapasayloan sa inyong mga sala. Madawat ninyo ang gasa nga Espiritu Santo.” Oo, Sir, mao kana mismo ang iyang gisulti.”

“Oh, gisulti ba gayud niya kana?”

“Oo, Sir, gisulti gyud niya.”

“Bueno, ingon niana man mismo ang Akong pagkasulat Niini.”

“Ingon niana man sàb mismo ang pagkasulti niya Niini.”

“Hmm!” Oo, sir.

180 “Ang ingon sa pipila niini, ‘Pabilin ùna kamo sa siyudad sa Jerusalem hangtud nga masul-oban na kamo og gahum gikan sa Kahitas-an. Sa diha nga ang Espiritu Santo mokunsad na kaninyo, kamo mao ang Akong mga saksi sa Jerusalem, sa Judaea ug sa Samaria, ug hangtud sa kinatumyan sa kalibutan.’ Sa dihang nabasa niya kana, siya misinggit og, ‘Alleлуйа, mao kana’y inyong gikinahanglan!’ Kabalo ba Ka kung unsay iyang ginabuhat? Ginadala niya sila didto mismo hangtud nga madawat gyud nila Kini, kana lang, og nagapabilin siya mismo uban kanila.

181 “Ug kung mosugod na silang maglalisay, moingon siya, ‘Whoop, whoop, whoop, kadali lang, kadali lang. Ingon niana baya ang pagpanglihok sa mga kanding, dili sa mga karnero.’ Kita Mo? Kita Mo? Oh, usahay mangasuko na sila kaniya, pero medyo pikpikon ra niya sila diha sa likod, og moingon, ‘Kadali lang, sh-sh, sh-sh, sh. Okey lang.’ Kahibalo gyud siya kung unsaon pagdumala ang maong mga karnero. Oo, Sir, sultihan Tà Ka.

182 “Kabalo ba Ka kung unsa? Nakita Ko si Arsobispo *Ingon niani-ug-ingon niana* nga gisultihan siya nga ‘dili siya puedeng moadto sa *niini* nga lungsod ug magpahigayon og panagtigum.’ Apan, kabalo Ka, medyo gipangunahan Ko siya, ingon Ko, ‘Umadto ka bisan pa man.’ Kita Mo? ‘Bakwia kini nga mga teyp, ug ayaw na kini ipang-apod-apod pa.’ Pero nagpadayon gihapon

kami! Pag-adto namo sa niining mga lungsod dinhi, ang ingon, 'Bueno, dili na namo supor-...'

¹⁸³ "Ug abi Nimo, miadto didto ang yawa, miingon, 'Pustahan pa tà mahimo ko siyang babagan sa pag-adto didto sa maong lungsod.' Ingon Ko, 'Dili mo kana mahimo. Kay kung sultihan Ko siya nga moadto, moadto man siya. Sigurado Ko nga moadto gyud siya.' 'Dili, dili, dili, dili, dili, tungod sultihan ko siya. Moadto ako ug moingon, "Karon, ang tanan kong mga alagad, magtigum kamong tanan. Ayaw baya ninyo nianang karaang panatisismo nga maania dinhi, ang tanan nianang Balaanong pagpang-ayo ug bahin nianang Espiritu Santo. Milabay na man kana kaniadto pa sa mga apostoles daghan nang mga tuig ang milabay. Kabalo mo nga wala kana'y kapuslanan, kaniadto pa.'" Ginahatagan sila og mga ironweed, og tanan nang ingon niana. Sila...

¹⁸⁴ "Apan, kabalo ba Ka, miadto gyud siya didto bisan pa man. Miadto gyud siya didto ug hinay-hinay nga gipang-itsa ang alfalfa, gikan sa...Ug abi Nimo, hinay-hinay pud nga nangaon ang mga karnero, og nagakatambok na gayud sila. Oo, Sir. Samtang nagapahigayon sila og mga pagpang-ayo ug mga panagtigum ug, abi Nimo, daghan na pud niadtong mga kabatan-onan ang nanagsugod. Aba, nakita man gud nila nga kung aduna sila'y dakung pundok sa dagami nga sama niadtong sa alfalfa. Kabalo ba Ka kung unsay ilang gihimo niadto? Pagkalami gayud niadto hangtud nga nanagdagan sila paingon sa mga silingan, miingon, 'Tilawi n'yo Kini! Tilawi n'yo Kini! Tilawi n'yo Kini!' Kita Mo, ang kahimtangan didto sama ra gayud dinhi mismo. Ania Kini dinhi mismo. Ania Kini mismo, kita Mo. 'Maghinulsol lang kamo, ang matag usa kaninyo, ug magpabautismo sa Ngalan ni Jesus, kita n'yo, og madawat ninyo ang Espiritu Santo. Para Kini sa dunay tinguha, paanhia siya, paanhia siya dinhi aron makita niya kung unsay giingon sa Biblia.' Kita Mo? Ug nagkasadya gayud sila didto."

¹⁸⁵ "Oh, mao kana ang Akong anak! Mao kana ang Akong batang lalaki. Bueno, sa hunahuna Mo hamtong na gyud kaha siya?"

¹⁸⁶ "Oo. Sigurado gayud," ang ingon sa Balaang Espiritu. "Gihatagan Ko na siya og mga pagsulay. Aba, gisulayan Ko na siya sa *ingon-ani* nga paagi, gisulayan na siya sa *ingon-ana* nga paagi. Gilup-og Ko siya, nga nagmasakiton, gipukan Ko siya. Gitamakan Ko siya, gitugotan Ko ang yawa nga buhaton nganha kaniya ang tanang butang nga mahimo niini, pero mibangon gyud siya pag-usab. Mibangon siya nga mao sa gihapon. Kita Mo, mibangon gyud pag-usab. Gihimo Ko siyang nagmasakiton. Gibuhat Ko ang *ingon-ani*. Gibalhog Ko na siya ngadto sa ospital. Gidala Ko siya dinhi og gibuhat ang *ingon-ani*, gibuhat Ko ang *ingon-ana*. Akong gihimo nga mobatok kaniya ang iyang asawa, Akong gihimo nga mobatok kaniya ang iyang

mga silingan, Ako gayu'ng gihimo nga mobatok ang tanan-tanan. Pero wala gyud gihapon kana'y bisan gamay'ng kalahian. Miingon hinoon, 'Bisan pa nga Iya akong patyon, sa gihapon ako mosalig Kaniya.' Gipapatay Ko na ang iyang pamilya. Gikuha Ko ang *ingon-ani*, gibuhat Ko ang *ingon-ani*, gibuhat Ko ang tanan nang *ingon-ani*, gibuhat Ko ang *ingon-ani*, *ingon-ana*, og *uban pa*. Sa gihapon mibarug gayud siya, 'Bisan pa nga Iya akong patyon, sa gihapon ako moalagad Kaniya! Siya'y akoo na!'"

¹⁸⁷ "Oh! Bueno, nagatoo Ko nga angay na Nato siyang tawgon ngadto sa usa ka gamay'ng espesyal nga puwesto ug magpahigayon og pagsagop."

¹⁸⁸ Bueno, ang amahan kaniadto, sa Daang Tugon, pag nasayod na nga ang iyang anak mihamtong na, ug hingkod na alang sa pagsagop. Alang sa! Hinoon natawo sila ingon nga anak, ug, sila'y usa na ka anak dihaduha mismo. Pero dili sila mamahimong labaw pa sa usa ka anak, kondili usa lamang ka ordinaryong anak, gawas kon mahamtong na sila ug makita na kung unsa gyud sila. Dayon, kung ingon-niana tawgon na siya sa amahan.

¹⁸⁹ Karon ania na kita, iglesia. Andam na ba mo? Bueno medyo nagkabii na gyud, mao nga ang tanan paaka sa ninyo ang inyong tudlo, pukawa ang inyong espiritu, ug hikapa ang inyong dughan, sa makadiyut lang. Kita n'yo? Karon ipahimutang na nato ang iglesia. Bueno pagmodangat na ang iglesia sa ingon-ana nga kahimtang, moingon Siya, "Manases, dinhi dapit ang imong puwesto. Ephraim, dinhi sab dapit ang imoha."

¹⁹⁰ Dayon dalhon niya ang anak ngadto sa usa ka puwesto, dalhon sa amahan, ug ipahimutang niya siya diha sa usa ka mahabog nga puwesto nga sama *niini*, ug maghimo ang amahan og seremonya, ug manabong ang tanan. Ug moingon ang amahan, "Gusto kong mahibaloan sa tanan nga kini mao ang akong anak, ug ginasagop ko ang akong anak. Ug gusto kong mahibaloan ni kinsa man, nga sukad karon, ang iyang ngalan . . . gibistihan ko siya, gibistihan siya og espesyal nga bisti. Ug gusto kong mahibaloan ninyo nga ang iyang pirma sa tseke pareho ra nga nakapirma ang akong ngalan sa maong tseke. Siya'y akong anak, ginasagop ko siya ingon akong pamilya, bisan pa man nga anak ko na siya sukad niadtong gipanganak siya. Sukad nga iyang nadawat ang Espiritu Santo, anak Ko na siya. Ug karon ginapuwesto ko na siya diha sa kagamhanan. Kung unsa ma'y iyang palagpoton mapalagpot, kung unsa ma'y iyang kuhaon para mahimong trabahante madawat.

¹⁹¹ "Ug sa pagkatinuod, sa pagkatinuod, magaingon Ako kaninyo, kung magaingon ka niining kahoy, kung magaingon ka niining bukid, 'Bumalhin ka,' ug dili magduhaduha sa imong kasingkasing, kondili toohan nga mamatuman gayud kanang unsa ma'y imong giingon, maangkon mo kanang unsay imong giingon." Kita n'yo? Ingon niana; ingon niana. Kita n'yo? "Siya'y

Akong anak.” Pila man ang nasayod nga sa pagsagop, nga sa . . . ginasagop nila ang maong anak human nga mapamatud-an kini nga usa ka . . . Ang tanan nga nakabasa na sa Biblia, bahin sa pagpahimutang sa anak.

¹⁹² Bueno, mao gihapon ang gibuhat sa Dios ngadto sa Iyang Anak kaniadtong gidala Niya si Jesus didto sa Bukid sa Pagkabalhin. Gidala Niya didto si Pedro, si Santiago ug si Juan, ingon nga mao’y tulo ka saksi sa yuta. Atua pud si Jesus, si Moises ug si Elias, ug ang Dios, didto sa maong bukid. Atua sila didto sa bukid. Ug, sa kalit lang, pagtan-aw nila, ug gihimaya si Jesus sa ilang atubangan. Husto ba? Pila man ang nasayod nga sumala kana sa Kasulatan? Unsa ma’y gibuhat sa Dios? Iyang—Iyang gibistihan Siya og bisti sa pagkawala-na’y-kamatayon. Ug miingon si Mateo, “Ang Iyang bisti midan-ag nga sama sa adlaw.” Husto ba kana? Ug gilandongan sila og usa ka panganod. Ug sila ni Pedro ug si Juan, nanaghapa. Ug pagtan-aw nila, atua si Moises ug si Elias, nga nagapakig-istorya kay Jesus. Ug dugay na baya nga patay si Moises, ug gilubong didto sa wala na hingsayri nga lubnganan sulod sa walo na ka gatus ka tuig. Ug si Elias usab gisakay og usa ka carro paingon sa Langit, lima ka gatus ka tuig sa wala pa kadto. Whew! Apan atua gihapon sila didto! Atua sila nga nagapakig-istorya Kaniya. Kita n’yo, gidala Niya si Jesus didto aron makigkita kanila, aron makita kung unsa gayud kadto, makakita didto, og ipakita Kaniya kadtong mga butanga. Ug nagpakig-istorya sila Kaniya, nagkaaduna og pagpakig-istorya uban Kaniya.

¹⁹³ Dayon sa dihadiha nga milingi pag-usab si Pedro ug wala na kaniadto ang paghimaya kang Jesus, si Jesus na lang ang ilang nakita, ug dihay usa ka Tingog nga gikan niadtong panganod, ug ang ingon, “Kini mao ang Akong Anak nga pinalangga, patalinghugi ninyo Siya! Ang Iyang Ngalan ingon gayud ka halangdon nga sama sa Akoa karon. Patalinghugi ninyo Siya!” Mao kana, gisagop na, o mga anak nga gipuwesto na.

¹⁹⁴ Karon, ngadto niana ginapaninguhaan sa Dios nga maipadangat ang iglesiang Pentecostal diha sa Basahon sa Mga Taga-Efeso. Kita n’yo? Inyo bang—inyo bang nasabtan? Kinahanglan na natong humanon tungod kay nagkabii na kaayo, kita n’yo, katulgon na gani ang mga bata. Ug gusto ko na unta nga makadangat dinhi mismo niini nga bersekulo, pero dili na nako mahimo, hangtud sa—sa ika-13 nga bersekulo, kita n’yo, ang ulahing bahin, “giselyohan sa Espiritu Santo sa saad.” Hisgotan nato kana inig ka Dominggo, kita n’yo. Matikdi n’yo. Karon, kung sa unsang paagi, nga ginapasulod kita niana, ug kung sa unsang paagi kita ginatipigan Niini.

¹⁹⁵ Apan karon aron nga “maipuwesto,” unsa man kamo? Una natawo kamo pasulod ngadto sa Gingharian pinaagi sa Espiritu Santo. Pila man ang nasayod niana? Maayo. Ang sunod, kamo’y gipili-nang-daan ngadto sa unsa man? Pagkasinagop.

Unsa man kana? Kamo'y gipili-nang-daan alang ngadto sa pagpahimutang.

¹⁹⁶ Oh, si Igsoong babayeng Scott, man siguro kanang, anaa dinha. Dili ba ikaw man kadtong miadto sa balay karong adlaw? Dunay usa ka pagtudlo nga nagakaylap sa kon asa man sa kalibutan, sa nagkalainlaing bahin sa nasud, hinoon nadungog ko na kana, sa makadaghan na, nga si Jesus kono ania sa yuta, nagalakaw-lakaw nga anaa sa usa ka lawas, nagasulod kono Siya ug nagabuhat og *ingon-ani*. Bakak kana! Iyang Balaang Espiritu ang ania karon, ug ginapaninguhaan Niyang ipuwesto ang Iyang Iglesia, ipahimutang ang Iyang Iglesia diha sa kahan-ayan, og ipahimutang Kini sa Yutang saad, aron nga sila makasulod...aron nga mapalagpot ang tanang mga kaaway.

¹⁹⁷ Dili makuha ni Manases ang iyang yuta. Dili ako mahimong magpahigayon og panerbisyo sa pagpang-ayo kon ang katunga sa...kon ang...pag moadto ako didto ug magwali og bautismo sa Ngalan ni Jesus Cristo, ug ang—ug moingon ang mga kaigsoonang trinitarian, “Oh, siya’y karaang Jesus Only.” Ug dili sàb ko mahimong moanhi dinhi ug magpahigayon og Balaanong pagpang-ayo kon ang katunga kanila nagaingon, “Maayo man ang Balaanong pagpang-ayo,” ug samtang daghan kanila ang nangalipay sa mga milagro sa Ginoo ug nagaingon, “Bueno, nagatoo man ko nga usa ka propeta si Igsoong Branham, apan sultihan ko kamo og usa ka butang. Samtang anaa pa kaniya ang Espiritu, ug nagapang-ila siya, nan alagad siya sa Ginoo. Apan dunot man ang iyang Pagtudlo, Dili maayo.” Kinsa ba ang nakadungog na og ingon-niana nga binuang? Mahimong iya kini sa Dios o kaha kini dili iya sa Dios. Tinuod. Mahimong bug-os kining iya sa Dios o kaha dili gayud sa Dios. Ingon niana lang kini. Apan unsaon man ninyo sa pagpakaangkon? Nga dili man gusto ni Manases nga magpabilin sa iyang luna, dili gusto ni Ephraim nga magpabilin sa iyang luna, dili pud gusto ni Gad nga magpabilin sa iyang luna, dili usab gusto ni Benjamin nga magpabilin sa iyang luna, nangbiya man hinoon silang tanan og nakig-uban dinhi sa mga Filistihanon, ug bug-os na nga nagkasagol-sagol. Unsaon man nato sa pagkahan-ay? Apan natawo man kita sa Espiritu Santo, kitang tanan. Husto ba? Para sa unsa ba nga natawo kita? Sa pagpili-nang-daan... Dayon human nga natawo, kita’y gipili-nang-daan ngadto sa pagkasinagop, aron maipahimutang diha sa Lawas ni Cristo. Nasabtan n’yo ba ang buut kong ipasabot?

¹⁹⁸ Unsa ba ang Lawas ni Cristo? Ang uban mga apostoles, ang uban mga propeta, ang uban pud mga magtutudlo, ang uban sàb mga ebanghelistang ug ang uban mga pastor. Husto ba kana? Gitawag kita para niana. Ang uban usab adunay mga gasa sa laing mga pinulongan, paghubad sa maong pinulongan, kaalam, kahibalo, mga milagro, pagpamuhat og mga milagro, og tanan

na niining nagkadaiyang mga gasa. Ug karon unsa ma'y ilang gibuhat? Nagabuhat sila niana og diyutay. Unsa man? Basta na lang kining ginabuhat nga daw sa wala na ko kahibalo kung unsa. Motindog ang usa, magasulti og laing mga pinulongan, ug ang laing usa usab padayon, nga magasulti, "Blrr, blrr, blrr, blrr, blee." Uh-huh. Magwali ang magwawali, mohimo og pagtawag sa altar, ug adunay motindog, nga magasulti og laing mga pinulongan, "Alleluyah! Himaya sa Dios!" Pero kung ang—kung mahitabo gani nga magpadayon ra ang magwawali sa iyang mensahe, tungod sa dihog, moingon dayon ang mga tawo, "Tigulang nga backslider." Kita n'yo na, tungod kay wala man sila gikatudloan.

¹⁹⁹ Miingon ang Biblia nga ang espiritu sa mga propeta napailalum ngadto sa propeta. Ang Dios dili man tigpasiugda og kasamok. Mao nga pag nagatindog ko dinhi, o ang usa ka ministro dinhi anaa ilalum sa pagdihog sa Dios, bisan unsa pa ninyo ka gusto nga magsulti og laing mga pinulongan, maghilum lang usa mo hangtud nga mahuman na ang Dios dinhi. Dayon kung magsulti man mo og laing mga pinulongan, dili kini basta na lang nga pagsumaysumay og Kasulatan, tungod kay miingon man ang Dios nga dili kamo magagamit sa pagsumaysumay nga walay kapuslanan. Kondili usa kini ka mensahe nga direkta mismo ngadto usa ka tawo. Pangutan-a n'yo ako og usa ka higayon, itudlo n'yo kon aduna ma'y usa ka higayon nga ang Espiritu Santo sukad-sukad, ilalum sa pagpang-ila, nagsulti sa usa ka tawo, nga gisumaysumay ang usa ka Kasulatan. Gisulti mismo Niini ngadto kanila ang usa ka butang nga ilang problema ug usa ka butang nga ilang nabuhat, ug usa ka butang nga kinahanglan nilang buhaton o kaha usa ka butang nga kinahanglang mahitabo, o mora'g ingon niana. Husto ba?

²⁰⁰ Mao usab sa pagsulti og laing mga pinulongan ug sa paghubad! Kung aduna ma'y usa sa iglesia nga nagasulti og laing mga pinulongan, ug dunay usa pa nga magahubad niini, nan tugoti kanang isaysay kini: Pasagdi nga motindog si Igsoong Neville ug magsulti og laing mga pinulongan, ug kining igsoong lalaki dinhi ang magahatag sa paghubad, moingon, "Sultihi kining lalaki dinhi nga kagahapon mianhi siya ug may gibuhat nga usa ka butang nga dili niya unta angay'ng gibuhat. Bueno giingnan siya sa doktor karong adlaw nga aduna siya'y kanser. Moadto una siya para ihusto kana nga butang, og mobalik dinhi ug magpasig-uli sa Dios."

Moingon ang maong lalaki, "Tinuod gayud, kamatuoran kana." Kung ingon niana nagauban kaninyo ang Dios.

²⁰¹ Apan unsaon man nato sa pagbuhat niini? Kita n'yo? Basta na lang ba, "Blmp, blrr, blrr, blrr." Gapataka-taka na lang, bisan unsa nga paagi na lang, wala gayu'y pagkahan-ay. Karon kana'y... Kita n'yo, ang Mga Taga-Efeso kaniadto, gapaningkamot... Kita n'yo, wala nila kini makit-i. Kita n'yo na

kung unsay hinungdan nga wala nila kini makit-i? Pero gipili na gyud kitang daan ngadto sa pagkasinagop ingon nga mga anak! Karon pila man ang nakasabot sa buut kong ipasabot? Ipataas ang inyong kamot. Pagsagop! Natawo kita diha sa Espiritu sa Dios, oo, nadawat ang Espiritu Santo, ug misinggit, “Abba, Amahan! Alleluyah! Himaya sa Dios!” Tinuod, kita’y, mga anak, pero mora’g wala man kita’y napaingnan. Dili gani nato mapildi-pildi ang mga Filistihanon.

²⁰² Tan-awa n’yo si Billy Graham nga atua didto. Ug miingon kadtong Mohammedan, “Pamatud-i Kini.”

²⁰³ Tan-awa n’yo si Jack Coe nga atua didto. Ug kadtong ateista, kadtong church of Christ nga nakiglamano didto sa maong ateista, ug naglamanohay. Usa man unta ka Cristohanon, pero nakiglamano pa sa usa ka yawa nga sama ni Joe Lewis, nga usa ka tawong ginasalikway ang unsa man nga relihiyon, ug nanunglo pa gani sa Dios ug miingon “wala ma’y ingon nianang butang sama sa Dios, bisan unsaon, sa sugod pa lang,” ug mga ingon nianang butang. Ug ang usa ka iglesia nga nagapatawag pa mismo nga church of Christ kono, pero nakiglamano kaniya, ug mibatok kang Igsoong Jack Coe. Unsaon man nato pagbuhat ug unsa mang butang? Ug ang mga Pentecostal, daghan kanila, ang mibatok pud sa maong igsoon; nga, ang matag magwawali sa nasud angay nga mibarug unta sa pagsuporta kaniya, ug miingon unta, “Dios, ipaanhi ang Imong Gahum.” Kita n’yo, ingon niana kita, ingon nga dili pa gyud maipuwesto.

²⁰⁴ Ayaw ni Ephraim nga magpabilin. Moanhi ang usa kanila, mahibaloan nato nga moanhi pud si Manases dinhi, moingon, “Oh, my, gihatagan ko sa Ginoo og maanindot nga kamaisan!” Dayon ania nagaabot pud dinhi, si Gad, moingon, “Bueno, karon, kadali lang. Abena man unta ang akong itanum, pero magtanum na lang pud ko og mais. Alleluyah!” Nakita n’yo? Wala man ka’y kahilambigitan sa mais; pagtanum og abena, kon abena man ang imong bahin nga itanum. Dili pud kamo angay’ng mag-alima og mga karnero kon mga baka man ang angay n’yong alimahon. Ginatinguha sa Dios nga ipahimutang ang Iglesia. Apan ang matag usa kanila gusto man nga buhaton ang mao rang butang. “Alleluyah!” Dili mo gani sila masultihan og usa ka butang mahitugod niana. Dili, dili. Aduna man gud gihapon sila nianang kinaiyahan nga iya sa kanding, “Butt, butt, butt, butt, butt, butt, butt.” Kita n’yo, dili mo sila masultihan. Husto kana. Karon, dili ba tinuod kana? Ug mao nga dili mo maipahimutang ang iglesia. Kita n’yo?

²⁰⁵ Ang iglesia gipili na man untang daan ngadto sa pagkasinagop ingon nga mga anak, kon diin ang usa ka tawo... mahimo man sa Dios nga mopili og usa ka tawo ug sagopon siya ingon nga pamilya, ug hatagan siya og unsa mang butang. Pero kana, una, sulayan pa kana ug hibaloong kung husto ba gyud kana. Ang Biblia miingon nga sulayan n’yo ang

espiritu. Kon nagaangkon kini nga tawo og usa ka butang, sulayi n'yo kana ug hibaloa kung tinuod ba gyud. Kung tinuod man kana, nan pagpadayon mo niana. Dayon moingon, “Ginoo, padalhi kami og lahi na pud nga butang.” Magpadayon lang, kita n'yo, magpadayon lang hangtud nga magpabilin ra ang matag tawo sa iyang posisyon. Dayon makita ninyo ang iglesia sa Dios nga hinay-hinay nang nagakahan-ay sa posisyon niini. Dayon mao na kana ang higayon nga moatras na ang mga Filistihanon. Mangawagtang na ang mga purol, motaas na ang buhok, mahinlo na ang mga nawong; wala na'y mga sigarilyo. Tinuod kana. Sa diha nga hinay-hinay nang nagakaplastar ang Iglesia ngadto sa gamhanang Gahum Niini, sa dihang anaa na kanato ang usa ka Ananias ug Safira, ug ang pipila kanila. Oo, sir. Makita ninyo sa dihang magabarug na ang balaang Iglesia diha sa Iyang Gahum, nakapuwesto na ingon nga mga anak sa Dios, gisagop na ingon nga pamilya sa Dios, gamhanang Iglesia nga nagabarug sa himaya Niini. Oh, mao kana'y Iyang balikan.

²⁰⁶ Nakita n'yo na kung unsa na kita ka halayo, mga igsoon? Dili man gani kamo magkauyon bahin sa Kasulatan. Ug ang si kinsa man nga tawo, si kinsa man nga tawo nga dili makita ang bautismo sa tubig diha sa Biblia, sa Ngalan ni Jesus Cristo, tingali'g buta gayud siya o kaha daut ang iyang pangisip. Husto. Ug dinha na ang dakung panaglantugiy.

²⁰⁷ Akong—ginahagit ko ang si kinsa man nga tawo nga dalhon kanako ang unsa man nga Kasulatan kon diin dunay si kinsa man ang nabautismohan sa unsa mang uban pa nga ngalan gawas sa Ngalan ni Jesus Cristo, diha sa bag-ong iglesia. O, kung nabautismohan siya sa unsa mang ubang paagi, nan kinahanglan niyang magpabautismo pag-usab sa Ngalan ni Jesus Cristo, aron madawat ang Espiritu Santo. Umanhi kamo og ipakita kanako. Wala gayu'y ingon niana. Wala gayu'y ingon niana nga sugo. Sa dihang miingon si Jesus kaniadto, “Busa panglakaw kamo, tudlo-i ang tanang kanasuran, og bautismohan sila sa Ngalan sa Amahan, Anak, ug Espiritu Santo,” ang Amahan, Anak, ni ang Espiritu Santo, dili man ngalan ang usa niana, wala gyud ni usa niana, og miadto si Pedro, human sa napulo ka adlaw, ang ingon, “Maghinulsol kamo, ug magpabautismo, ang matag usa kaninyo, sa Ngalan ni Jesus Cristo, alang sa kapasayloan sa mga sala.” Ug bisan asa sa Biblia. . .

²⁰⁸ Ug dayon aduna ma'y pipila kaniadto nga nabautismohan, sa ubang pamaagi, ni Juan, nga ngadto sa paghinulsol lang. Ang ingon ni Pablo, “Kinahanglan ninyong magpabautismo pag-usab. Kinahanglan ninyong moduol pag-usab.”

²⁰⁹ “Oh, apan gibautismohan na man kami sa usa ka halangdong balaan nga tawo, nga si Juan. Siya gani ang nagbautismo kang Jesus.”

²¹⁰ “Bueno, kini mao ang Maayong Balita. Kini mao ang

Espiritu sa Dios nga nagpadayag niana kanako. Usa ako ka apostoles sa Ginoo, ug kung may moabot nga usa ka manulonda gikan sa Langit ug magawali og lain pang . . . ”

²¹¹ Basahon ko ùsa kana. Ang Biblia miingon, “Kung ang usa ka manu- . . . ” Ang ingon ni Pablo, “Kung ang usa ka Manulonda nga gikan sa Langit magasulti og unsa man nga lahi,” obispo, arsobispo, santo papa, o tigdumala, bisan unsa pa man siya, “kung magawali siya og unsa man nga lahi gawas Niining gikawali ko na kaninyo, ipatunglo siya.” Walay . . . Wala kita’y ingon niana nga naandan. Wala, sir. Kamo lang . . . Wala gayu’y ingon-anang butang. Kamo, kita . . . Ug kung ingon niana—kung ingon niana, kita n’yo, nganong dili man kana makita sa mga tawo? Nganong ang mga tawo dili—dili—dili man motoo niana? [Adunay nagaingon sa kongregasyon, “Gipili-na-mang-daan”—Ed.] Kita n’yo? Aduna dinha nga naigo gyud niya ang punto, si Gene. “Gipili na mang daan,” eksakto. Ngano man? “Ang tanan nga gikahatag Kanako sa Amahan” (unsang man?) “magaari Kanako.” Eksakto gayud! “Ang tanan nga gikahatag Kanako sa Amahan magaari—magaari Kanako.” Unsa ba’y nahitabo kanako, nga duna ko’y gisige’g pangita dinhi? Ania na. Okey.

²¹² Basahon ko lang kini nga bersekulo ug dayon isulti ko kaninyo ang sa kang Pablo, ang mga butang nga . . . Ang mismong Mensahe nga akong giwali karong gabhiona, ania mismo sa gisulti ni Pablo mahitungod sa pagpili-nang-daan, mahitungod sa bautismo sa tubig sa Ngalan ni Jesus, ang bautismo sa Espiritu Santo, ang paghan-ay sa iglesia, ug uban pa. Ania ang gisulti niya:

Nahibulong ako (ginasultihan kining Mga Taga-Galacia) nga sa kalit mingbalhin kamo gikan kaniya nga nagtawag kaninyo ngadto sa . . . grasya ni Cristo (gikaulaw ko gayud kamo, sa laing pagkasulti, nga gitugotan n’yong adunay moanhi dinhi, og ginapahilayo kamo gikan Niana.) ngadto sa laing maayong balita:

Dili nga adunay laing maayong balita; kondili nga adunay nagapagubot kaninyo, ug buut magababag sa maayong balita ni Cristo, magababag sa tinuod nga Maayong Balita ni Cristo.

²¹³ Apan matikdi n’yo. Karon, hinumdumi n’yo, nga si Pablo kadtong nagpugos sa matag tawo nga wala pa nabautismohan sa Ngalan ni Jesus Cristo, nga moduol ug magpabautismo pag-usab sa Ngalan ni Jesus Cristo. Pila man ang nasayod nga tinuod kana? Pila man ang nasayod nga si Pablo ang nagsulti niining mga tinago nga dugay nang gililong sukad pa sa pagkatukod sa kalibutan, ug kaniya gikapadayag, nga kita’y gipili-nang-daan nga mamahimong mga anak sa Dios ngadto sa pagkasinagop, si Pablo kadto? Tan-awa n’yo dinhi ang gisulti niya:

Apan bisan pa kon kami, o usa ba ka manulonda nga gikan sa langit, magawali kaninyo og lain nga maayong balita nga lahi kay sa amo nang gikawali kaninyo, ipatunglo siya.

214 Dili lang basta moingon, “Dili ako mouyon kanimo, mister.” Kondili ipatunglo gyud siya. Akong basahon ang sunod nga bersekulo:

Sumala sa amo nang gikaingon kaniadto, usbon ko karon ang pag-ingon, Kung may tawo nga magawali kaninyo og maayong balita nga lahi kay sa amo nang nadawat, ipatunglo siya.

215 Husto kana. Karon, igsoong lalaki, igsoong babaye, kung ang Dios mismo kadto niadtong miaging adlaw, ug ako—ginasulti ko kini, nanghinaut nga dili unta ingon nga walay-pagtahud, nga nagdala kanako aron makita kining gamay’ng... Karon, ginanerbiyos ako; siguro dili man gyud ingon nga ginanerbiyos, napanalanginan lang gayud ako sa pagwali. Nagakawala ako sa akong kaugalingon ug napalangan ko kamo dinhi hangtud nga katulgon na mo ug gikapoy na kabalo ko. Apan, oh, ako... Kung kamo—kung nasayod lang mo kon daw sa unsa ko gayud gitinguha nga mapadangat ko kamo didto! Kita n’yo? Ug sa dihang ako, pag isulti ko na usab kini, sa dihang ako... sa dihang miingon Siya... miingon ko, “Mamahimo niini...”

Ingon Siya, “Gusto mo bang makita kung unsa ang katapusan?”

216 Ug milingi ako ug nakita ang akong kaugalingon nga nagahigda didto sa higdaanan. Sigurado gayud nga nakaila na mo kanako sa igong gidugayon nga—nga—nga nahibalo na mo na nga Kamatuoran ang akong ginasulti kaninyo. Aduna ko’y gustong ipangutana kaninyo, sama sa gisulti ni Samuel kaniadto sa wala pa nila gidihogan si Saul, aduna ba ko’y gisulti kaninyo sukad og bisan unsang butang diha sa Ngalan sa Ginoo kondili kung unsa lang ang kamatuoran? Tinuod ba? Kamatuoran man gyud pirmi. Sukad-sukad ba miduol ako kaninyo para mangayo og salapi o unsa man nga ingon niana? Wala, kita n’yo, wala gyud ko sukad nangayo. Aduna ba ko’y gibuhat sukad og bisan unsang butang kondili gipaningkamotan ko gayud kutob sa akong mahimo nga madala kamo kang Cristo? Mao gayud.

217 Bueno gusto nilang ingnon nga usa kono ako ka mental telepathist, kabalo na mo, usa ka nagabasa sa panghunahuna og pagbati. Siyempre, managpanungha man gyud ang mga ingon niana, miingon ang Biblia nga managpanungha sila. Maingon nga si Jambres ug si Jannes misupak kang Moises, ngani halos nabuhat nila ang maong butang nga gibuhat ni Moises, hangtud nga miabot na sa pagpakigsangka. Husto kana. Apan hinumdumi n’yo, nga si Jambres ug si Jannes dili man makapang-ayo. Dili sila makapang-ayo. Hinoon mahimo nilang

maghatud og mga hampak, apan dili na sila makahimo sa pagwagtang niana. Kita n'yo? Bueno. Karon, ang Dios mao ang Mananambal. Ang Pulong sa Dios nagapabilin gyud nga Kamatuoran.

²¹⁸ Ngani gipaningkamotan kong magmatinuuron kaninyo. Gipaningkamotan kong isulti kaninyo ang Kamatuoran. Akong—akong...sulod sa mga traynta'y-uno ka tuig, mibarug ako dinhi niining pulpito, ngadto-nganhi, sulod sa trayta'y-uno ka tuig, ug sa umaabot nga adlaw tingali'g motaliwan na aron moadto na sa Himaya biyaan kini nga pulpito. Aduna ko'y asawa, anak nga babaye, amahan, igsoong lalaki, nga nakalubong tanan didto mismo, og minahal nga mga higala usab. Akong nakita ang ila mismong mga lungon ug ang mga bulak nga gipahimutang dinhi, ug nasayod ko nga sa umaabot nga adlaw ang sa akoa na, usab. Bueno, tinuod kana. Apan matinuuron gayud, sa tibuok kong kasingkasing, ginasulti ko kaninyo sa tibuok kong kasingkasing, nagatoo ko nga ang tinuod nga Ebanghelyo ni Ginoong Jesus Cristo mao gayud ang akong gikawali kaninyo. Nagatoo ko nga kinahanglan kamong magpabautismo, ang matag usa kaninyo, sa Ngalan ni Jesus Cristo, ug aron madawat ang bautismo sa Espiritu Santo. Ug pagmadawat na ninyo, magadala kini kaninyo og kalipay, pakigdait, pagkamapuanguon, pagkamaayo, pagkamalulot, kaaghop, pailub, og pagtoo.

²¹⁹ Ug niadtong miaging adlaw, kung unsa ma'y nahitabo kanako niadto nga buntag, wala ako mahibalo. Dili ko masulti kon anaa lang ba ko dinhi sa akong lawas ug nakakita lang og panan-awon, o gikuha ba kaha ako gikan dinhi, og paingon didto. Wala ako mahibalo, dili ko masulti. Ang butang lang nga nahibaloan ko, nga ako—mahadlok ako nga mamatay sa una pa, dinha nianang gamay'ng dapit sa ikot. Apan wala ako mahadlok tungod basin dili ako kuhaon ni Jesus, ha, wala ako mahadlok niana, tungod kay ako—wala gyud ko mahadlok niana; kondili kung matagbo ko kamo nga usa na lamang ka gamay'ng panganod nga nagalutaw-lutaw sa hangin. Pero nakita ko na man karon. Pagkakita nako niadto nga mga tawo, sila'y tinuod gyud. Ug sila kadtong mga tawo nga akong nakauban kaniadto dinhi sa yuta, bisan ang akong unang asawa. Dili ko na siya asawa, siya'y igsoon ko na. Wala niya ako gitawag nga iyang bana, kondili iya akong gitawag nga iyang minahal nga igsoon. Wala na didto'y pagpakighilawas, wala gyu'y ingon niana nga matang sa pagbati, wala na gayud; hingpit kadto, pagkamalumo kadto, kahingpitan na kadto.

Nakahunahuna hinoon ko, wala ko kabalo, pero nakahunahuna ko: Ingon niadto kaha ang iyang nakita, sa wala pa siya mitaliwan sa yuta? kaniadtong atua siya sa ospital, niadtong gitawag ko siya, ug ang ingon niya, “Billy, nakawali ka na bahin niini, nakahisgot ka na mahitungod niini, apan,”

ingon siya, “wala ka kabalo kung unsa gayud kini.” Ingon pa siya, “Wala na ko’y tinguha nga magpabilin pa.”

²²⁰ Nahunahuna ko kung mao pud ba kaha kadto, sa diosnon, balaan nga tigulang lalaki nga si F. F. Bosworth, nga mibarug pud dinhi niini nga pulpito, nga nagwali uban kanako ngadto sa nagkadaiyang mga bahin sa kalibutan. Ang tigulang nga si F. F. Bosworth, kamong tanan, halos, nakaila man kaniya; ingon nga diosnon, balaan nga tigulang lalaki. Duha ka oras kaniadto, bueno, mga usa o duha ka semana sa wala pa siya mitaliwan, giduaw ko siya ug atua siya nga nagahigda na, nga mga, halos nubenta’y anyos na ang panuigon. Gitunol niya ang iyang gamay’ng nangunot na nga mga bukton, ang gamay’ng opaw niyang ulo ug kadtong ubanon na nga balbas sa iyang nawong. Akong gigakus kadtong tigulang nga lalaki ug mihilak ako, “Amahan ko, amahan ko, ang mga carro sa Israel ug ang mga mangangabayo niini.”

Tungod kay kon aduna ma’y usa ka tawo nga nagrepresentar sa Pentecostes ug usa ka tinuod nga apostoles, si F. F. Bosworth kadto, mahinlo, direktang, tinuod nga Ebanghelyo, kita n’yo, si Bosworth kadto. Ug sa paggakus ko na kaniya, ug mihilak gyud ko, “Amahan ko, amahan ko, ang mga carro sa Israel ug ang mga mangangabayo niini.”

²²¹ Ingon siya, “Anak, magpabilin ka sa natad sa pagpangmisyon.” Miingon, “Unhi na ang pipila niining batan-on pa nga mga magwawali diha sa natad sa pagpangmisyon gawas sa nasud, kung mahimo mo, adisir pa sila makadala og daghan nga panatisismo didto. Dalha kanila kanang tinuod nga Ebanghelyo nga aduna ka, anak.” Ingon pa siya, “Wala pa magsugod ang imong ministerio kung itandi sa kung unsa gayud ang umalabot.” Miingon, “Usa ikaw ka bag-ong Branham.” Ingon pa, “Batan-on ka pa, anak.”

Ingon ko, “Igsoong Bosworth, kuwarenta’y-otso anyos na man ko.”

²²² Ingon siya, “Pero wala pa gyud ka makasugod.” Ingon siya, “Ayaw’g pasagdi kining batan-on pa nga mga Pentecostal nga magwawali nga makadangat didto nga dala ang hilabihan nga panatisismo, ug hiloan ang maong butang, ug aghaton pa ang tanan nga—nga mga diplomata ug ang tibuok nasud nga mobatok Niini sa dili ka pa makadangat didto.” Miingon, “Lumihok ka na, Igsoong Branham, magpadayon ka sa Ebanghelyo nga imong nabatonan.” Ingon siya “Ako—nagatoo ko nga usa ikaw ka apostoles, o usa ka propeta sa Ginoo nga atong Dios.”

²²³ Gitan-aw ko siya, ako siyang gigakus. Ingon ko, “Igsoong Bosworth, aduna ko’y gustong ipangutana kanimo. Unsa man ang pinakamalipayon nga panahon sa imong. . . nga higayon sa imong. . . sa tanang mga tuig nga nagwali ka?”

Ingon siya, “Karon mismo, Igsoong Branham.”

Ingon ko, “Kabalo ba ka nga hapit na ka nga mamatay?”

Ingon siya, “Dili ako mahimong mamatay.”

Ingon ko, “Unsa . . . Nganong nasulti man nimo nga kini na ang pinakamalipayon nimong higayon?”

²²⁴ Aduna didto’y usa ka gamay’ng pultahan. Ingon siya, “Nagahigda ako dinhi nga nakaatubang ang akong nawong diha nianang pultahan. Unsa mang orasa karon, ang Usa nga akong gihigugma, ug ang Usa nga mao’y katuyoan sa akong pagpangwali ug pagbarug, sa tibuok niining . . . tibuok kong kinabuhi, moabot Siya diha niana nga pultahan para kanako, ug mouban na ako Kaniya.” Samtang gitan-aw ko siya, nahunahuna ko, ako—nagtan-aw ako nga daw sa nagtan-aw usab ako kang Abraham, Isaas, o kang Jacob.

²²⁵ Akong gigunitan ang iyang kamot, ingon ko, “Igsoong Bosworth, nagatoo kita sa mao ra nga Dios, nagatoo kita sa mao rang butang. Pinaagi sa grasya sa Dios mowali gayud ako hangtud nga mobiya na sa akong lawas ang kaulahian kong ginhawa. Magpabilin gyud ako nga matinud-anon sa Dios sumala sa nahibaloan ko kung unsaon sa pagpabilin. Dili ako mopakigkompromiso sa Ebanghelyo sa unsa man nga bahin o unsa man nga punto. Magpabilin ako nga matinud-anon sumala sa nahibaloan ko kung unsaon sa pagpabilin. Igsoong Bosworth, tagboon ko ikaw didto sa usa ka mas maayo nga Yuta kon diin dili ka na mamahimong batan-on . . . o dili na matigulang pa, kondili batan-on na gyud.”

²²⁶ Ingon siya, “Mamaatua pud ka didto, Igsoong Branham, ayaw’g kabalaka.”

²²⁷ Ug usa ka oras sa wala pa, duha ka oras sa wala pa siya namatay . . . mga duha ka bulan human niadto, abi ko man gud og mamatay na siya niadtong tungora, misulod ang akong asawa ug mitan-aw kaniya (pirmi gayud niyang mahinumduman siya), ug pagkahuman si Mrs. Bosworth. Ug human sa mga duha ka oras nga siya naghigda, natulog. Nakamata siya, mitan-aw siya, ug mibangon siya sa iyang higdaanan. Ingon siya, “Mama, aba, wala na ta ka nakita sulod sa daghan nang mga tuig! Papa! Igsoong Jim, aba,” miingon, “atong tan-awon, usa man ka sa akong mga nakabig ngadto sa Ginoo, didto sa Joliet Illinois.” Pero singkwenta ka tuig na ang milabay nga namatay ang maong igsoon. Kita n’yo? Oo! Ingon siya, “Ikaw man si Igsoong babayeng *Ingon niani-ug-ingon niana*. Oo, gidala ko ikaw paingon sa Ginoo didto—didto sa panagtigum sa Winnipeg. Oo. Aba, ania pud si Igsoong babayeng *Ingon niani-ug-ingon niana*. Wala na ta ka nakita . . . Oo, kita mo, miduol ka sa Ginoo didto sa *ingon niani-ug-ingon niana*.” Ug sulod gyud sa duha ka oras nakiglamano ra siya niadtong iyang mga gidala sa Ginoo. Dayon mibalik na sa iyang higdaanan, ug mihigda, nga gikrus ang iyang

mga kamot, ug mao na kadto. Nakasulod kaha si Igsoong F. F. Bosworth niadtong Yuta nga gipakita kanako ni Jesus niadtong miaging gabii? Kung mao man, nan atua siya didto nga usa na ka batan-ong lalaki karong gabhiona. Papahulayon unta sa Dios ang iyang kalag. Ug hinaut nga magkinabuhi ako nga ingon gayud ka maunongon aron makasulod ako nianang Yutaa. Ug hinaut nga mamahimo gyud akong usa—usa ka matinud-anon nga alagad ni Cristo!

²²⁸ Gikaulaw ko ang akong kinabuhi. Gikaulaw ko ang kani- . . . ako—ako . . . Kung nakasala man ko sa inyong atubangan mga igsoon, kamo—obligasyon ninyo nga moduol kanako og sultihan ako. Kita n'yo? Naningkamot ako nga magkinabuhi nga matarung sa tanang butang nga ginapabuhat kanako sa Dios pinaagi sa Iyang grasya. Kita n'yo? Kita n'yo? Apan, ania, mga higala, obligasyon ninyo nga moduol kanako kung aduna man kamo'y nasayran nga sayup sa akong kinabuhi, og sultihan ako. Ug, ania, obligasyon ko usab kaninyo nga motindog dinhi ug iwalì kaninyo ang tinuod nga Ebanghelyo. Obligasyon ko kini kaninyo, tungod kay nagalaum man ko nga makita ang tagsa-tagsa ninyong mga nawong, nga batan-on na nga mga lalaki ug mga babaye, didto mismo sa tabok sa maong utlanan. Ngani usa lamang ka ginhawa ang gintang sa inyong nahimutangan karon ug didto. Karon, tinuod kana. Atua kini didto.

²²⁹ Ug hinaut nga ang Dios sa bug-os nga grasya, ang Dios sa Langit, dili ingon nga panamastamas, kondili may-pagtahud gayud, “Papa” nianang mahimayaong adlaw sa dihang igapresenta na kami pabalik dinhi ug magkaaduna na usab og yutang-ong lawas, aron makainom kami, ug makakaon og ubas ug sa bunga sa yuta. “Kon diin sila magatukod og mga balay ug dili lain ang magapuyo. Sila magatanum og mga kaparrasan ug dili lain ang magakaon niini.” Kita n'yo? Pag magtanum og parras ang usa ka tawo, iyang anak ang magakaon niini, ug dayon iyang anak na pud ang magakaon niini, ug ang anak na usab niini. Apan dili na ingon niana didto; tungod kay siya man ang magatanum niini ug magpabilin ra. Kita n'yo, husto kana. Mamaatua kita didto hangtud sa kahangturan. Ug hinaut nga, didto nianang Yutaa, hinaut nga matagbo ko ang matag usa kaninyo.

²³⁰ Ug kabalo ko nga nagasulti ako dinhi bisan sa mga ministrong trinitarian usab. Ug, mga igsoon ko, dili ko kini ginasulti—dili ko kini ginasulti aron magpasakit. Usa ako ka Trinitarian, usab, nagatoo man ako sa trinidad, ang tulo ka kinaiyahan sa Dios (Amahan, Anak, ug Espiritu Santo), apan dili ingon nga tulo ka Dios. Kita n'yo? Nagatoo ko nga adunay tulo ka kinaiyahan, sa walay pagduhaduha, nagatoo ko niana sa tibuok kong kasingkasing, “Amahan, Anak, ug Balaang Espiritu,” apan dili kana sila tulo ka Dios. Kana'y tulo lamang ka kinai- . . . o ang tulo ka opisina sa Dios. Nagpuyo man ang Dios kaniadto diha

sa pagka-Amahan, pagka-Anak, ug sa karon diha sa Espiritu Santo. Kini'y mao ra nga Dios diha sa tulo ka opisina. Ug aduna kini'y . . .

²³¹ Ug ang Amahan, Anak, ug Espiritu Santo, dili kana Ngalan sa Dios. Ang Dios adunay usa ra ka Ngalan, ug ang Iyang Ngalan mao si Jesus. Ang Biblia miingon, “Ang pamilya sa Langit gipangalanan og Jesus, ug ang pamilya sa yuta gipangalanan sàb og Jesus.” Husto kana. Busa ang Dios adunay usa ra ka Ngalan, tawhanon nga Ngalan. Siya kaniadto . . . adunay ngalan nga gitawag og Jehovah-jireh, Jehovah-rapha, pero mga titulo ra kana sa Iyang Pagka-Dios. Tungod aduna man Siya'y usa ra ka Ngalan: Jesus! Ug Siya kana.

²³² Ug sa tinuod lang, mga igsoon ko, kung dili man kamo mouyon kanako, hinumdumi n'yo, ako—ako—tagboon ko gihapon kamo didto, bisan pa man. Kita n'yo? Ako'y—mamaatua ako didto uban kaninyo. Ug panalanginan kamo sa Dios. Ug gihigugma ko kamo.

²³³ Ug karon buut kong hinumduman sa iglesia, nga sa Dominggo sa buntag ato ra kining ipadayon ug paningkamotan kong dili kamo langanon og mas dugay pa sa alas dos, aron nga makapahigayon pa kita og panagtigum sa hapon, kung mahimo nato, ug kung mapalangan ko man kamo nga sama sa akong nabuhat karong gabhiona, nga alas diyes-traynta na. Pasayloon n'yo ba ako? Mga higala, wala na kita'y daghang oras nga nahibilin, pinangga. Ako—tawgon ko kamo nga “pinangga” tungod kay ingon-ana man kamo. Kamo—kamo ang akong mga pinangga. Kabalo ba mo kung unsa? Atong . . . Ania nadumduman ko ang usa ka Kasulatan. Miingon si Pablo, “Ako may pagpangabugho kaninyo (sa Iyang Iglesia) sa diosnong pagpangabugho, kay kamo Ako na mang gikasaad nga maasawa.” Ingon niana, mao kana. Mao kana. “Kay kamo Ako na mang gikasaad nga maasawa, gikasaad nga maasawa ni Cristo, ingon nga birhen nga ulay.”

²³⁴ Bueno, kung matinuod na kana nianang adlaw, ingon niya . . . Sila, miingon kanako kadto nga mga tawo, miingon, “Moabot si Jesus kanimo, ug imo na kaming ipresentar ngadto Kaniya,” ingon nga birhen nga ulay. “Pagahukman ka sumala sa Pulong nga imong giwali kanila.” Ug, ania, kung giwali ko kaninyo ang kung unsa lang gayud ang giwali ni Pablo ngadto sa iyang iglesia, kung makasulod ang iyang pundok, nan ang atoa usab, tungod kay gibatonan man nato ang mao ra mismong butang. Amen.

Iduko nato ang atong mga ulo samtang moingon kita, “Panalanginan ka sa Dios.” Karon . . . ? . . . ang minahal natong pastor, Igsoong Neville. 

60-0518 Pagsagop #2
Branham Tabernacle
Jeffersonville, Indiana U.S.A.

CEBUANO

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org